

EBÈLÙ, NSHAPÌTÀ MWISÂTÙ



Mwoyi wènù awu mu dinda emu, balundà bàànyì. Ndyèsè dya kwikala kaaba aka mu dinda emu mu mudimu wà Mukalenge. Ne tudi tutèkemena ne tweyemena ne netwikalè ne cikondo cya dicyònkomoka.

² Mvwa anu mu...citùvwà tubiikila ne mbirò byà balami, mùkaadi bisanjì bya dikwàta naabi mèyì bisanganyiibwa mpindyewu amu, ne mvwa nyiikilangana anu ne nsongàakàjì kampànda wa citende ne mamwèndè mwòmù amu, bàà ku Joliet, mu Illinois. Ne mvwa anu ndyàmbidila mushindu wùvwa mwànà wa bakàjì awu cipeta cya ngàsà wa Nzambi. Bààbúngì bàà kutùdi kaaba aka mbamumanyè. Mmu—mmukwàciki wa maalà a kapyà, umwe wa ku bàà mushindu wa mutàmbe bubì awu. Ne kacya kabàvwakù banjì kundondela bwalu abu bitòòke to anu mu dinda emu, mwàkuumukàye pa cibùmbà cya ku cyambilu. Mukalenge ùvwa mumusokòlwèle byònsò bìvwà bibì ne bìvwà mwa kwenzeka. Ki kuumukayè pa cibùmbà cya ku cyambilu, wènda ùdila mwadi ne ùcyònkomoka bwalu Nzambi ùvwa mumusùngile ku—ku lukitá lwà buukanwàyì. Ki yèyè...Inàbànza kampànda kuyayè tàmakàtamàkà too ne kùdiye kàdi kukùtula mwadi, bwa ne mwanèndè wa bakàjì, ngeela meeji ne mmùvwàbì, ùvwa mukwàciki wa maadrogues. Nenku nudi bamanyè's, ku ngàsà wa Nzambi, nsongàakàjì awu wàkabiiikidiibwa (Ngeela meeji ne, òvwa ndilòòlò dyàkalondà adi's, Rosella, kubiiikidiibwaye?), ne nsongàakàjì awu, kwondopiibwayè, ku bukwàciki bwa maadrogues. Nenku yèyè ne bàyèndè ki kuyiishabò Evanjeeliyo eku. Ne—ne—ne pa kumòna inàbànza mutekète mulenga bu mùdi Rosella wàwa, mutwè mukèlè anu bya menemene! Ne yèyè mwine patùdi twakulangana apa, wa bàneemeka bikolè, ùdi ne...ùmvwà dibiiikila mu mwoyi wèndè. Kàdi, mumanyè Bible pa bidì bitàngilà bayiishi bakàjì, nwamònu's, mmumanyè ne ncintu kampànda cikwabo. Nenku Nzambi ùdi ùmulombola mu màlokò ne bikwabo, bwa kufila bujaadiki.

³ Bidi anu bilenga bilayà bwa—bwa—bwa kumanya, bwa kukèba diswa dya Nzambi. Musangu kampànda tudi tuumvwa njiyà kampànda, kàdi tudi baswè kuya kabweja njiyà ayi mu myaba kampànda; wèwè kùyi mutàngile bìmpè to, dyabùlù neàngatè miine njiyà ayi ne àyinyangakàjè àyìvwijè cintu kampànda. Kàdi misangu yònsò yitùdi anu tushàala mu Bible, díbà adi tudi mu bulelèlè, nudi numòna's, tudi tuya kumpàla anu ne diswa dya Mukalenge.

⁴ Pa nanku mèmè ndi ngiitabuuja ne—ne ndekeelu wa byònsò Rosella neàkudimukilè ku dikabwela mu budimi bwa

bwambi mu mwaba kampànda, bwalu Amerike kî mmuswè Evanjeeliyo to.

Bwa aci kaayi nudi bamanyè. Mbipìcìbwe ne twètù biitàbe aci ne, ba-Anglo-Saxons aba kwabo nkumanè kujika. Kwàjikì. Kakùcyèna kabidi Evanjeeliyo wíkala Amerike mwa kwakidila to. Kaa, nudi nupeta ndambù wa biimakanyi bàà mu njila, ku musangu ne ku musangu. Kàdi, bwa Evanjeeliyo pa yèyè anyì, nkujikè. Kàdi kwèna mwa kubayiishakù mene to, kwèna mwa kwakula naabò to. Kabààkwitabuujakù cintu to. Nwamònu anyi? Bàdi bóbò anu ne mmwènenenu yabo ya sungasunga ya dipapisha dya mitu ayi, ne mbashààle nanku.

Ne cyàlondà bwa ditùnga edi neilumbulwidi. Bwa cilumbulwidi, dyòdi's nedicipetè. Cìdi mwa kuvwila ku lukòta. Cìdi mwa kuvwila ku bómbe bwa mushindà. Cìdi mwa kuvwila ku cipùpù cinène, disaamà anyì cintu kampànda, kàdi, dikaadi pabwipi naaci. Dilwalwa. Bantu binunu kuvudija ku binunu nebàponè.

⁵ Tuvwa tupicila, makèèlèlà awu, mèmè ne Mwanèètù Zabel, ku...ne Mwanèètù Wood, tulwa tufùmina ku Kentucky, kutùvwà benzè matùkù asatu, ne bapicìle ku mwaba wùdi mwasa nzùbù ya disòmbela. Mwanèètù Zabel kwambayè ne: “Kakwènakù...” Nyewu ngàpù mwoyi. “Pàmwè ne bònsò bàà ku bantu abu, mu mwaba wùdi mwasa nzùbù ya disòmbela awu, kabèènakù nànsha bàya mu ekeleeziya to.”

⁶ Udi mufwànyine kubàkonkaci. “Ee, s'tudi ne télévìsion wetù. Mushindu awu ngutùdi tupeta bwetu busàmbi.” Nwamònu anyi? Ki lwidi lwà beena Amerike ndwòlò alu. Nwamònu anyi? “Tudi ne télévìsion. Tudi ne mfrangà bùngì cyanààna. Tudi ne tùshinyi tulenga, tudi ne nzùbù milenga. Citùdi tukèngela Mukalenge ki cinganyi? Katwèna tujinga Aci to.” Ki lwidi ndwòlò alu.

⁷ Bwa ntèndeleeleu umwèpelè ne lupàndù lutùdi naalù, ne dinanga, bìdi anu munkaci mwa bantu bàà difwàna dya Nzambi bàà cya bushuwa. Nudi bamanyè's, Bible mmwambè ne aci necyènzekè. [Disangisha didi dyamba ne: “Amen.”—Muf.] Uh-huh. Nwènu babadi bàà Bible, ngùmùvù munwätù “Amen” wa cikunda amu, ne wèwè muyiishi udi paanyimà pàapa wàwa. Ne, ncyà bushuwa. Dinanga òvwa mwa kwikala kule menemene, mu matùkù a ndekeelu; dinanga dimwèpelè òvwàku mwa kwikala dishààle, òvwa mwa kwikala munkaci mwa Basungula bàà cisàmbà cya Nzambi. “Taatu òvwa mwa kwikala òlwishangana ne maamù, ne maamù òlwishangana ne taatù, ne bàna bàlwishangana ne baledi, ne bantu bashiilèshiiàngàne bàlwishangana muntu ne mukwèndè.” Nenku dinanga dimwèpelè òvwàku mwa kwikala dishààle, bàvwa mwa kwikala anu Basungula abu, anu Basungudiibwe

abu. Mwakù “Musungula” awu wùdi wùfùmina ku mwakù “Musungùdìibwe,” cisàmbà cisungùdìibwe cya Nzambi.

⁸ Nenku pàvwà Rosella ùndondela bwalu abu mu cibambalu mwàmwa, kùkaadi katanci, mvwa anu ngeela meeji, ne, mu diine dilòlòlò adi, yêyè kwamba ne cintu kampànda cyàkenzeka. Ne mwàkambàye, ne, mu matùkù èndè ònsò a mwoyi, pàvwàye ànu, kanwàyi wa mèsù mapilula, kabàyikù mwà kwangula mpasu to, ba-Alcooliques Anonymes abu, bangàngàbukà bànaayi bàkaavwa bamwelè làà, kakùyikù cìvwà mwà kwenjiibwa to, ne mùvwàbi ne, kubangila ànu pa diinè dìbà adi, cintu kampànda kwenzekaci.

⁹ Patùdi twakulangana apa yêyè kàcyenà kabidi wa mèsù a lwonji awu to. Ùkaadi nsongàakàjì mulenga, mulenga kumòna wa bidimu makumi asatu ne bisatu, ne mufwànyine kumwèka bu wa bidimu bìipacila makumi abidi ne bibidi; anu mùdi Nzambi mumwenzèle cìdiYe mumwenzèle aci, ne mùkaadiye mwine ùmwèka mushiilàngàne’s wè. Ne, kàdi mèmè kwamba ne: “Rosella, kumpàlà kwa difùkà dya dyulu ne buloba, Nzambi ùvwà mudyànjiile kulongolola cikondo aci.” Eyowa’s, mukalenge. Nwamònu anyi? Cya bushuwa. Ne pàvwà Billy Paul mukese udi paanyimà pààpa wàwa, mwaba wùdiye awu, munkaci mwa kwabanyina bantu twartà twà disambila diine dilòlòlò adi, s’bìvwà bikolè bwa kumanyayè ne mwine uvwayè ùpèèsha kartà kàà disambila awu nganyì.

Kì mbilenga bilayà anyi, Rosella?

[Mwanèètù wa bakàjì Rosella Griffith ùdi wàmba ne: “Mwanèètù Branham, ndi ndikonka ní ekeleeziya ùdikù mwa kusambila bwa Nzambi wàtùlombòlakù, mushindu wùvwàYe wa makànda.”—Muf.]

Amen. Mukalenge àkubènèshè, Rosella. Ndi mutwìshìibwe ne netwènzè nanku. Mmuswè bwa ekeleeziya àsambilèku bwa Nzambi àmulombòlè. Mbwena kwamba ne, kulonda cianza Cyèndè cidi kaciyi cishintuluka. Kaa, s’mbìmpè be.

¹⁰ Mbantèèkèlè disungula dya bwalu bukolè kumpàlà kwànyì, mu dinda emu. Mbwa mmuntu kampànda, mwena miliyò ne miliyò ne miliyò ya ndola udi muswè kwenza bintu mu Louisville, Kentucky emu, ne kungiibakila tabernacle wa ùyiila miliyò yitaanu ya ndola. Kàdi cintu kampànda munda mwa mwoyi wànyì kwambaci ne: “Anjì indilà tùng, wèwè kwèna mpaasàtá to.” Nwamònu anyi? Pa nanku, dìbà adi, mfrangà miliyò yitaanu ya ndola’s yìdì mifwànyine kwikala milongolola. Mpindyewu pamùtù pàà kukèngelabi bwa kuyayi kwa mbùlàmatadi, bwa kufùta bwa maalà a wiskì ne bintu bya mushindu awu, kàdi yêyè mmuswè kuyèèla mu tabernacle bwa Mukalenge. Kàdi mèmè ndi ntèkemena bwa kuyayi kùdi musadidi kampànda wa Nzambi wìkala...ne mudimu kampànda wà Nzambi. Kàdi, ayi’s nndola miliyò yitaanu

milongolola bwa mpindyewu. Elààyibi meeji ku bwalu abu ne, ncifwànyine kwikala tabernacle wa mushindu kaayi.

Udi umòna mùdìbi bìmwèka bilenga bilayà anyi, Rosella? Kàdi kùdi cintu munda *emu* cyàmba bishiilàngàne. Nwamònu anyi? Nwamònu anyi? Cintu munda *emu*.

11 Tudi tulwa mu kaatabernacle kakese, kàà kale aka, nwênù beenyi aba. Ee, eci's ncifwànyine kwikala mwaba wà wùbàlakana mu disangu emu, kanwèna nufika ku dimanya aci to, bwa ne bantu bàtu baswè bwa kwibaka mwaba ewu ne kuwùvwija nanku. Kàdi mushindu ewu ngutùdi twètù bawùnangè. Nwamònu's, mushindu ewu ngutùdi bawùnangè. Nkwasa ya kale yitùvwà tusòmbamù ayi, yivwa nnkwasa ya—ya kale ya ntwàdijilu ya mu tabernacle emu, yàkapìcila mu dipaasalala dya màyi adi ne kulèlemayi.

12 Bible wanyì mushààle mubuulula nùnkù *ewu* pa cyambilu. Yèyè kuya katwà too ne mu pàlàfò ne kwalukila ne Dìyi dya Nzambi diikàlePù ne: “Mémè Mukalenge ngudi mucikùne. Mémè ngwacìmyamina màyi muunya ne bufùku bwa muntu kàlu kucìnyènga mu cyanza Cyànyi.” Mushindu mwine wutwàkapìcilàpu twenda twita kaabwàtù, *apa*. Ki kwalukilaci buludì panshi, nkwasa kwalukila anu pa myaba yàyi. Cyònsò cyàkakèngelà bwa kwenzabò cìvwa anu kukùpupapù ne kutùngunuka. Nwamònu anyi? Nwamònu anyi? Pa nanku mushindu ewu ki wutùdi bacìnangè, wùdi bantu anu bèètù bàà pàtupù aba, mwaba anu wètù wà pàtupù ewu, kàdi Mukalenge wa ùkèmesha. Amen.

13 Mpindyewu, leelu ewu, tudi ne, tucidi anu tubangilakù ne dibwela mu bushikishiki, nudi bamanyè's, paanyimà pàà—pàà mabèèle ònsò mamana kuumusha, anu bushikishiki's. Nenku vùlukàayi ne, bikèngela mabèèle bwa kupàtula bushikishiki, nudi bamanyè. Bu—bushikishiki ki bintu bìdi mu mabèèle.

14 Pa nanku tuvwa mu nshapità wa 1, mwi2, ne tudi tujikijila mu mwi3, ne tubangila mu nshapità mwi4 wa Mukàndà wà butùmbì wà Ebèlù awu. Nenku, kaa, malongesha a Mukàndà ewu's wè! Tudi bafwànyine kushààla naaCì mu, pa mvensà umwe, munda mwa ngondo yisatu, ne kuleeja anu ne Bible mujimà ùdi úswikakana ne mvensà yònsò mu Bible. Nukààvwakù bakwèlèlè meeji anyi? Kakwèna mvensà nansha umwe ùdiku mwa kutwà munu, kùyi, ku ngàsà ne dikwàcisha dya Nyuma Mwìmpè, katùyi mwa kutwàngajaMù Genese ne Bwàkabuulwibwà to.

15 Kakwènakù katùpà kakwabo kàà mikàndà mifùnda mu mwaba kampànda kàdiku mwa kwenza nanku to. Ne ku makùmi, ne ku maalu a buloba, mu mushindu wònsò, kakwènakù Mukàndà mu Bible mufùnda bu Bible... kakwènakù mukàndà pa buloba, ncìndì njinga kwamba, mufùnda bu Bible to. Nansha kantu kàmwè kakèenakù to.

Makùmi a mu Bible àdi mu dinwàngana dipwàngàne; nansha anu nshapita nkàayaayi, ne bimanyinu bya mu difùnda, ne byònsò, mbipwàngàne. Kí mmu mukàndà mukwabo nansha wùmwe to; kwèna mwa kubalamù nshapita umwe kawùyi wùbèngangana ne wòwò mwine to. Kàdi kakwènakù dibèngangana nansha dimwè mu Bible mujimà emu to. Wa bwalu mmufùnda kùdi bantu bààbùngì, bààbùngì be, bààbùngì menemene; bashiilàngàne ntàntà ya nkàmà, ne nkàmà, ne nkàmà ya bidimu, kabàyi bamanyè katùpà . . . Umwe muCifùnde *apa*, ne mukwabo muCifùnde *apa*, ne mukwabo muCifùnde *apa*. PààkaWùbùmbakajàbo wònsò pàmwe, kwenzaWù Bible wa Nzambi. Kabiya bya ewu wùbèngangana ne mukwabo to, ne, to, nì mmakùmi, nì mmaalù a buloba. Cikwabo cintu kanà cyònsò cya Bible, bintu byònsò, makùmi, byònsò bìdi byènda anu pàmwe menemene. Aci cyòci kaciyi cisonsola to, ncyèna mumanyè's, ciwàbìikila ne ndinsonsola ncinganyi? Mèmè ndi ne disànka bwa Bible mubènesha, wa kale ewu.

16 Bàmwè bantu bàtu bambè ne: “Wèwè udi mwena Katolike anyi? Mwena Mishòonyi anyi?”

Mèmè ne: “Nì ng'ewu nì ng'ewu to. Mèmè ndi ngiitabuuya Bible.” Ncya bushuwa. Mèmè ndi ngiitabuuya Bible, ne ndi ne disànka dya mutùcidi anu ne budishikaminyi bwa kuMuyiisha mu ditùnga edi. Kaa, Yèyè's ngwa ùkèmesha's.

17 Mpindyewu netwikalè mwa kulongaMù. Nenku mpindyewu netùbuululè mu Mukàndà wa Ebèlù ne kubanga ne nshapita mwi3. Ne tuvwa bashiile ku mvensà wa 15. Nenku mpindyewu nwènù bònsò . . .

18 Ngàmònu muntu ùtàngila, kwènji katancì, pàngàmbùlù bìnètè byànyì bya kubala naabì apu. Kí nne mèsù àànyì mmabì to, kàdi nkàadi mupite pa bidimu makùmi anaayi. Ndi mwa kucibala, *apa* mene, anu bu pa ciibidilu, kàdi ne bìnètè ndi mwa kutàmba kucibala bìmpè. Nenku mbangenzèle bìnètè bya kubala naabì bìndì muswè kubala naabì, bwalu ndi mwa kutàmba kucibala bìmpè ne lùkàsà menemene. Nenku ki bwa cinyi ndi naabì. Mpindyewu mu . . .

19 Dyàmbedi, tudi baswèku ndambu mwaba wa kujaadikila bitùdi twamba, bwalu kùdi mwa kwikala beenyi munkaci mwetu, bàdi kabàyi bapètè citùpà cya kumpàlà cya Mukàndà wà Ebèlù to.

20 Udi Màdamù Cox anyi, wèwè udi musòmbe apa lwà ku ndekeelu ewu? Ee, ncya bushuwa ne ndikù ne disànka dya kumumòna. Kumpàlà mene kwa mèmè kubanga, bu bujaadiki bwa ngàsà wa Nzambi. Ki mukàji nyèyè ewu uvwa ne kànsèrè kamudyè kwìsù kujimà. Mmamwèndè wa Mwanèètù wa bakàji Wood. Ne mvwa nsanganyibwa mu Michigan ne Gene ne Leo, ne bakwabo, bàkwàta mèyi pa mikàbà. Kàdi patùkaavwà twalukila kumbèlu, mukàjàànyì kumbiikilayè, anyi

mémè ngwákamubiikila ku tèlefonè's wè. Yéyè ne: “Bwela dyákàmwè mu disambila bwa Màndamù Cox, mamwëndè wa Màndamù Wood, bwalu kànsèrè kàdi munkaci mwa kumudyà kwisù kwònsò.” Kàkaavwa kakabwelè ne mu luseke lwà dísù kakafikè ne pa mufübà, kalàke luseke lwà mpàla, kènda anu kàtangalaka. Ngàngàbukà kampànda mwenzèpu cintu kampànda, kàdi mubinyangè byònsò, ne mukàtangàlaje anu cyaààà; mwelèmu bwanga bwa mushindu kampànda.

²¹ Ki kuumukabò nendè ku Campbellsville, mu Kentucky, too ne ku . . . anyi, ngeela meeji, Acton, mu Kentucky, too ne ku—ku Louisville, bwa dyondopa.

²² Ki Màndamù Wood, musangu wànyì wà nzànzànzà wà dimumòna mucibùlùke. Bwalu, mu bushuwa bwa bwalu, mmaman wendè—wendè—wendè, ne ncyà bushuwa ne yéyè ùvwa anu mufwànyine kudyùmvwa mucibùlùke. Mémè kubwela mu cibambalu ne kumusambidila, ne dyeyemena ne Nzambi mmwambè ne Ùvwa mwa kwandamuna ku disambila. Nenku mu matùkù makese, kupàtukayè. S'ki yéyè udi musòmbe wàwa mpindyewu. Mwikàle anu ne ngàsà udi ukèmesha, mwàkamwenzelàYe amu.

²³ Udikù mwà kwimanyina kuulu anyi? Ncyèna muswè bwà—bwà ku—kukuvwija cyà bantu bònsò. . . Mpenyi, mpenyi pàvwa kànsèrè aku kasòmbèle? Ku—ku luseke lwà mpàla, mònaayi mwaba awu, ku *lwàlwa* luseke lwà mpàla, kapwekè kanyùngulùkile *eku*, ku mufübà wèndè wà ditàma, kubànda e kunyùngulukila dísù. Kàdi Nzambi kumwondopa's. Yéyè kí ngwa ukèmesha anyi?

²⁴ Mbanganyi bàvwàku kaaba aka mu dyàlumingu dishààle bwa kumòna civwà Mukalenge mwenzè ku cikèèna-kumòna? Muntu mulùme, eku mucibùkile pànshì eku mpofo, musòmbe anu kaaba aka mu dikalù dya balèma. Kàdi cintu kuntàpa ku mwoyi pàvwa mukùlákàjì awu musòmbe kaaba aka wàmba ne: “Mwanèètù Branham. . .” Ngeela meeji ne ùvwa mmwanèètù wa balùme udi kaaba aka ewu. Kwambayè ne: “Enzàku bya mwomùmwe bwa mukàjàànyì.” Ùdi ne mukàjì kaaba aka udi mucibùkile pànshì. Mwoyi wànyì kumfwàwù munda. Mvw'a kujinga. . . Mvwa mufwànyine kufila byònsò bìmvwà mwa kwikala naabi pa buloba apa, kàdi kacyèna. . . kacyèna mu bukòkeshi bwànyì mémè to. Kàdi cidi mu bukòkeshi bwànyì mémè ne mu bukòkeshi webe wèwè, bwa kulòmba bwa Nzambi àcyènzè. Ùdi ne mukàjì mucibùkile pànshì, ne cianza citekète, dikàsà ditekète, bimwèke nanku awu. Kàdi bya mulùme ewu yéyè bìvwa bibi bipite bya mukàjì awu, bwalu mukàjì ewu nyawu ùdi mwa kwimanyinakù kuulu ne kwendakù ndambù, kàdi muntu mulùme ewu yéyè kàvwakù mwa kwenza aci to. Nenku yéyè. . . Bwongò, kajiujilu kajaalamiji kàkaavwa kafwè. Ba-Mayo, bakwabo bààbúngì, bàkaavwa bamwelè làà. Ki mwena Katolike kampànda kumutùmàyè mwaba ewu,

ngàngàbukà mwena Katolike's; ne mwanèndè wa balùme ùtu nsaserdose ku Saint Meinrad mu Jasper mwàmwa, mu Indiana. Kàdi aci's cìdi cìtèèka mabwe a cishìmikidi bwa ditàbuluja dilwalwà, kuntwaku.

²⁵ Kàdi pààjuukidiye kuulu, yèyè kwamba ne: “Kàdi ncyèna mwa . . .” Kutàngilayè, kwamba ne: “Eyowa, ndi mwa kumòna.” Ûvwa ùdyàmbidila mùvwàye kàyi mwa kumòna to, nudi bamanyè's. Kàdi kubàndulukayè, ne kumuvwilabì anu cyanààna ne àjuulè mutù, kàdi ki yèyè awu mwa kwenda ne kumòna; kwendelayè mu kajila kàka, ùdyèndela nkààyèndè. Bàà bwalu bàvwa ba-Presbytériens. Yèyè ùvwa Orthodoxe. Kàdi nwamba pèènù. . . Nwènù bàdi bèèla meeji ne anu beena Mpenta anyi beena Cijila mbàdi mwa kwela mbilà's; s'nudi batùpàkàne. Bàdi cya bushuwa mwa kwelakù mbilà pàdibo bà mòna cintu kampànda cya nanku awu cyènzeka; bùùpukilangana bèèla mbilà. Ûbànda ùpweka ne bibàndilu, wènda ùpuusa dikalù dyèndè dya balèma adi; wèndela kuulu, ne kajilu kajaalamiji aku kakàyi mu mutù wèndè to. Elààyibì meeji ku bwalu abu. Wèndela kuulu anu mùdi wèwè anyi mèmè mwa kwendela kuulu amu. Kaa, Yèyè's mmukèmeshanganyi.

²⁶ Mpindyewu, Pòlò ngwàkafùnda Mukànda wa Ebèlù. Ne mu kufùnda kwa Ebèlù eku, yèyè ngwàkaCifùnda. Ne kumpàlà kwà kufundayè Mikànda eyi, tudi tusangana. . . Mpindyewu, netwikalè mwa . . . Eci nkàlaasà kàà Dyàlumingu, nenku nènteetè bwa kutàngila bwa kubènga kwangata dîbà dipitèpìte búngì. Ne pashìishe netwènzè masangisha, bwa kutùngunuka naabi dilòlò edi, bu Mukalenge mwa kwanyisha. Mpindyewu, mu Mukànda wà Ebèlù ne mikwabo Mikànda ya Pòlò mibàtùmina ayi. . .

²⁷ Pòlò ùvwa nganyi? Ûvwa mwena Ebèlù wa lulamatu lwà menemene, mumanyi wa dibàla, ne mulongeshi munene wa Dipungila Dikùlukulu. Ne yèyè ùvwa mulongèshìibwe kùdi nwe wa ku bantu batàmbe bwìmpè bàà mu ditùkù dyèndè. Muntu kampànda ùngambilèku ne dîna dyèndè ùvwà nganyi. Gàmaalièlè, umwe wa ku balongeshi batàmbe bunene bàà mu ditùkù dyèndè. Ne Pòlò ùvwa musòmbe ku makàsà a Gàmaalièlè.

²⁸ Kùdi cintu kampànda pa bidì bitàngilà. . . kùyaayà, ku ekeleeziya kùyaayà, ne mulongeshi udi ukulongeshà. Nuvwakù bamanyè aci anyi? Cìdi—cìdikù anu ne bwalu kampànda. Ki bwa cinyi bìvwà bikèngela twikalè tukèba cìdi cìtàmbe bwìmpè citùdiku mwa kupeta, bwa tùpetè cìdi cìtàmbe bwìmpè; kaciyi ne mbwalu ncyà mumanyè kusòmbe ne bantu anyi bikwabo to, kàdi dilongesha dilelèlè dya Bible.

²⁹ Tàngilàayi, musangu kampànda wàkapàtukà Izaleela e kuya mu cipèèla ne bilwilu byabo, ne benzè lwendu lule lwà matùkù mwandamutekète, kupangilabò màyi. Ne bàkaavwa bàmba

kwabùtuka, kwambabò ne: “Kaa, kwikalakù mupròfetà pabwìpì apa’s wè!”

³⁰ Ki umwe wabò kwambayè ne: “Tudi kuntweku, ne Elishà. Yèyè nguwwa wela màyi pa byanza bya Eliyà.” Nudi numòna beena dyèndè yèyè anyi? Mu ngaakwilù mukwabo ne: “Elishà nyèyè ewu uvwa muswikàkàne ne Eliyà. Díyi dya Mukalenge didi kùdiye.” Nwacyümvù anyi? Üvwa mulongèshìibwe bilenga. Ki yèyè ne: “Üdi kaaba aka. Tüyaayi tükamùkonkè, bwalu mulongeshi wèndè üvwa ng’Eliyà, ne yèyè üdi munda mwèndè ne dilongesha dya Eliyà.” Nudi numòna dishiilangana didici cifila anyi? Bushuwa’s. Tudi baswè kulongeshiibwa.

³¹ Pa nanku, Pòlò üvwa ne dilongesha dya Gàmaalièlè. Ne Gàmaalièlè awu üvwa muntu munene wàkenza disungula adi, mwikàle yèyè mwine mumanyi wa dibàla, uvwa mwenzè ne pààkabangà lukutukutu lwònsò lwà ekeleeziya wa ku cibangidilu elu, kwambayè ne: “Katùlengi aci to, bânà bèètù. Cyòci kaciya cya Nzambi to, kacyèna ne kwàyàci to, nansha bishi. Kàdi cyòci cya Nzambi, eku twètù tucilwisha, netùdisangànè munkaci mwa kulwishangana ne Nzambi.” Nwamònu’s, yèyè üvwa mupetè dilongeshiibwa dîmpè.

³² Pòlò üvwa mukolèle ku makàsà kwà muntu ewu, ne üvwa mumanyè ne Pòlò üvwa mulongeshi munene. Pa nanku, dîngà ditùkù, ne meeji matòòke mu mwoyi, ùkèngeshangana ne Ekeleeziya, üvwa üya bwa kabàkwàta.

³³ Mpindyewu twànjàayi kwangata anu kakwabo katùpà kàà bwalu bwa Pòlò, patùdi twangata pàà kushìndamijila bitùdi twamba apa.

³⁴ Pààkadishìndà Yudaàsà, ku dishipa dya mikenji, ku dinanga dya mfrangà ne maditàmishi a mu nsòmbelu, kudishìndayè kuumuka ku ngàsà ne kuyayè ku wèndè mwaba. Ki bayiidi kwambabò ne: “Kùdi ne cya kwikala dikumi ne babidi.” Nenku ekeleeziya, ne buneemè bwònsò bùvwàye naabù abu, bwa kunùleeja cidì ekeleeziya’s; ne buneemè bwònsò bùvwàye naabù abu ne bukòòkeshi bwèndè bwònsò abu, yèyè’s ùcidi anu mushààdile mu ntàntà wa miliyò ya kilòmèètà, ne mwèndè mwònsò. Kwambabò ne: “Bikèngela tükèbè, umwe munkaci mwetu, wikala mwa kwangata kaaba kèndè awu.” Ki kusungulabò, mu dyela dyà nshòòbò, Maatiyà. Màtiyààsà, ngeela meeji, anyi Maatiyà. Maatiyà, ngeela meeji nyèyè. Kàdi piine pààkamusungulàbo apu ne kumwelabò mu bàà dikumi ne babidi abu, mu bàà dikumi ne umwe abu, kwenzabò dikumi ne babidi, yèyè kààkenzakù cintu nansha cìmwè to. Awu ki wèndè pèndè musangu wùmwèpelè wùdiyèkù mutèèdìibwe mu Mifündu. Awu üvwa ng’ekeleeziya wàkenza disungula dyèndè.

³⁵ Mpindyewu, bààkeela meeji ne: “Mmuntu mukàlàngà.” Kakùyi mpatà to. “Mmuntu wa dikèma. Mmumanyi wa dibàla. Ngwa meeji matwè. Mmulongè túlaasà. Mmuntu wa

dikèma. Mmufwànyine kwangata kaaba kàà Yudaàsà ne kwikala umwe wetù.”

³⁶ Kàdi, nudi bamanyè's, Nzambi mîngà misangu ùtu wènda àmwè a...ku wetù mmwènenù, àmwè a ku masungula a matàmbe kwikala makùtākàne. Mpindyewu, Nzambi Yèyè kumòna keena Yuda kàà dyùlù dikònyàngàle, kùle anu tètè ne ciiji ne mwàkù mwònsò, ne mmbàngà misendemija ne: “Mèmè nênyekù, nkakwàtè yònsò wa kùdìbo. Nê—nêmbèlè mu bùlokò. Nêngènzè *cikampànda*.” Ki cìvwà disungula dya Nzambi aci.

Bakwabo abu bàakasungula mumanyi wa dibàla ne diplomate. Ki disungula dya ekeleeziya ndyòdi adi.

³⁷ Nwamònu's, kwèna mumanyè ne udi ku cyoshelu awu nganyì to. Kwèna mumanyè ne mwine ùdì wambila bujaadiki awu nganyì to, mu bùlokò amu anyì nî mpenyi. Mmufwànyine kumwèka bu mutuucyanganyi wa mànkòmù, ne maci malàadika panshì, ne mèsù mapanda muulu, ne, kàdi wèwè kwèna mumanyè ne nganyì mwine awu to. Udi wèwè wela anu nshòòbò cyanàànà, kwajìki, umupèèsha Diyì. Nzambi ngudi wenza disungula.

³⁸ Ki Nzambi kusungula keena Yuda kàà cilunji cibànde aka, anyì kumusungula Yè yèyè's wè. Pàvwàye wènda ùpweka ne njila: “Nênyekù nkabàkwàtè. Nê—nêmbàleejè cìndi mèmè mwa kwenza mushindu awu,” kàdi Nzambi kumubyànkula anu panshi mbyànkàà.

Nzambi kwamba Yè ne: “Ki Dyànyì disungula ndyòdi dyàdya, mwaba wàwa mene.”

³⁹ Aci kí ncifwànyinekù kwikala cikùtākàne anyì, bwa ekeleeziya? “Mòna's, yèyè's ùdi ùkèngesha ekeleeziya. S'muntu wa musunya.” Kàdi Nzambi ùvwà mumanyè cìvwà munda mwa muntu. Nudi bumvwè cìndi njinga kwamba aci anyì?

⁴⁰ Pa nanku, Pòlò kwenzayè dilabula. Mbanganyì bàdì bìitabuujà ne dilabula dìdi difùmina ku dikùdimuna dya mucima? Bushuwa's. Kabiyi nanku to, mèmè ndi mmufwànyine kwela dikùdimuna dya mucima mpàtà. Dikùdimuna dya mucima diti ditiwàla dilabula. Kàdi mpindyewu kwèna mwa kucyèlela mikàlu anu ku cintu kampànda to. Mîngà misangu ndifwànyine kwikala dyela dya mbilà. Mîngà misangu ndifwànyine kwikala dyakula dya mu myakulu. Mîngà misangu ndifwànyine kwikala didila dya mwadi. Mîngà misangu ndifwànyine kwikala ditwà dya mikèmu. Kwèna mumanyè ne ncinyì to, pa nanku kùteeci kucyèlela mikàlu to. Bwalu, yònsò wa kunùdì mmujaadike ne mmupùilemù, nwènù ba-Méthodistes, ne nwènù ba-Baptistes, ne nwènù ba-Nazaréens, ne beena Mpenta.

⁴¹ Mèmè nkàadikù mumòne bantu bèela mbilà ne mwabo mwònsò mùvwàbo mwa kwela amu, kàdi bàkwiba ngòlò wa ku mènù, bòbò ne mushindu. Eyowa's, mukalenge. Nkàadikù mumòne bantu bàakula mu myakulu byenzè bu bàdì

bàpòngolola nkunde pa cisèbà cya ngombe cyùme, ne—ne bwa kwamba menemene, bapàyike mfwankà wa dicyànkunya mu luseke lukwabo lwa mukana, ne bafwànyine kukukòsa muminu bu bôbò mwa kucyènza. Ncya bushuwa. Pa nanku bintu abi kabyèna ne. . . Kakwèna cileeji nansha cimwè bwa kucijaadika to, anu ku nsòmbelu udi nendè muntu. “Ku mamuma àbò, nkunwàbàmanyinà.”

⁴² Pa nanku, byònsò mbitàngile Nzambi. Yèyè ngudi wenza disungula. Yèyè ngudi utwàngaja bintu abi, ne mushindu awu ki wùdibi. Pa nanku nsòmbelu webè yèyè ùkùmbanangana ne mamuma a Bible, udikù ne mmwèneni mwimpè. Nyuma wenù yèyè ùfila bujaadiki pàmwè ne Nyuma Wendè ne, nudi bàna bàà balùmè ne bàà bakàji bàà Nzambi, udi. . . Bubi bwa kale bwònsò abu bùkaadi buumùke, ne byònsò bikaadi bilwè bipyabipyà, ne wèwè ukàadi ne nsòmbelu wa dinanga, ne udi ne ditalala, ne ngàsà, ne bikwabo, dîbà adi udi wenda useemena pabwîpi ne Bukalenge. Bwalu, Mwoyi wùdì munda mwebe ngùdì wùtwàla nsòmbelu wa mushindu awu. Nwamònu anyi?

⁴³ Wèwè wamba ne: “Kaa, aleluuyah, ndi mwakùle mu myakulu. Aleluuyah!” Aci kacyèna ne cidici cyàmba to. Aci kacyèna ne cidici cyàmba kutàmba wèwè mupàtùke apa mutuutè cikèmu kampànda ku cindaalà anyì cintu kampànda to. Aci kacyèna ne cidici cyàmba to. Nansha wèwè mwakùle mu myakulu, nansha wèwè mwelè mbilà, ne munyeemàkàne ubànda upweka ne kajila, ne mudilè mwadi wà bisònji byenzè bu uvwà uuvula màtùngulù, aci kacyèna ne cidici cyàmba to, nànsha cimwè, ambà anu nsòmbelu wa ku ditùkù ne ku ditùkù awu muCìtwe nyama ku mikòlò anu menemene, ne mushààle naaCì.

⁴⁴ Mpindyewu, wèwè wenza bintu abi, kusàkidilakù nsòmbelu awu, “amen,” abi, abi mbimpè. Abi mbimpè. Kàdi udi mwa kwenza bintu abi kùyì ne nsòmbelu awu to.

⁴⁵ Nenukù dîbà adi, nî ndyela dya mbilà, nî ncinyi cya mushindu awu kacyèna cileeji to. Yesu mmwambè ne: “Ku mamuma àbò, nkunwàbàmanyinà.” Kàdi mamuma a Nyuma kî ndyakula dya mu myakulu to. Aci kî ncidi mamuma a Nyuma to. Dyela dya mbilà kî mamuma a Nyuma to. Didila dya mwadi kî mamuma a Nyuma aa to. Kàdi, dinanga, disànka, ditalala, mwoyi mule, bwimpè, musàngeelu, diitabuuja, bupòle, kudikànda, ki mamuma a Nyuma ngòwò awu. Nwamònu anyi? Ki bidì mamuma a Nyuma mbyòbi abi. Eyo.

⁴⁶ Mpindyewu, cidì cyènza ne twikalè ne bintu ebi, bôbò mbaswè kwenza malongolodi, nudi numòna’s. “Ee, netùcipetè. Nzambi àbeneshiibwè, bònsò bàdì biitabuuja mushindu wutùdì *twètù* twitabuuja abu, netùye mushindu *ewu*. Bònsò bàdì biitabuuja mutùdì *twètù* twitabuuja abu, netùye mushindu *ewu*.” Kàdi Nzambi mmuswè bwa bònsò bàye mushindu *Ewu*, bàbànda buludì.

47 Mpindyewu, Pólò, paanyimà pàà yéyè mumanè kwenza dilabula edi, díbà adi kudyàmbidilayè ne divwa ndilabula dilenga be. Mpindyewu, mmunyi. . . Twánjì—twánjì—twánjì tùteelààyìbì ndambù diine dilabula adi. Pólò ùvwa mu njila mutàngile ku Damàsèkè, bwa kakwàtayè bantu kuntwaku, bwalu Evanjeeliyo ùkaavwa mutangàlàke too ne kwòkò aku. *Evanjeeliyo* mbwena kwamba ne “luumù lwímpè.” Nenu bàvwa batangàlàke too ne kwòkò aku, ne bantu bààbùngì bàvwa bènda bàjuuka, bùle téntè ne dinanga, ne disànka, ne banangè Mukalenge Yesu. Ne Ùkaavwa mutangàlàke mushindu awu. Pa nanku, Pólò kwangatayè mikàndà ya njila kùdi mwakwidi munene. Kwambayè ne: “Nényekù, ne nèmbàkwatè, muntu ne muntu.”

48 Ki kuyayè ne kasumbù kàà balami, balami bàà ku ntempèlò, mäsàlaayi, kumatayè mu njila nyéyè uyàaya wàwa. Pàvwàbò bènda bènda mu njila apu, ne yéyè mumanyè anu byònsò bivwàye ùya kenza, dyàkàmwè, cintu kampànda kwenzekaci. Dyàkàmwè, kùvwa Bukènkè bunene kumpàlà kwèndè, Bukènkè bunene. Mpindyewu, Bwàkakenkesha bu díbà. Aci’s ncintu cya pabwàci cya cyènzeka’s. Bukènkè abu bwàkakenka bikolè mu mushindu wà ne yéyè, mèsù èndè àkafofoma, mambè kufofoma’s. Ki kudìbyànkulayè panshì. Ki yéyè—yéyè kushààla mulàale panshì, kàdi kutàngilayè muulu.

49 Kùvwa pàmwàpa bantu dikumi anyi dikumi ne bataanu bàvwà nendè. Muntu wa kùdìbo wàkamònakù Bukènkè abu anyi? To, mukalenge. Pólò ngwàkaBùmòna. Kabìvwa bilongolola bwa bantu abu kuBùmònabò to. Nenu, bàmwè bantu bàdi mwa kumòna bintu kampànda, kàdi, bakwabo kabàyi bàbìmòna to. Nwamònu anyi? Pa nanku, Pólò wàkamòna Bukènkè abu, mu mushindu wà ne Bwàkamufomija ne dimufomija mene. Wàkashààla kàyi ùmòna to, munda mwa matùkù mulongolongo, Bùvwa bwa cya bushuwa kùdiye. Nenu wàkashààla kàyi ùmòna to munda mwa mulongolongo wà . . .

Pashìshe, pàvwàye ùfùnda mikànda, mèsù àvwa àmutàcisha bikolè kwangacila anu ku cyòci aci, mu mushindu wà ne ùvwa ùfùnda ne màleetà manene menemene. Wàkamba ne: “Mòna mùndì mukufùndile ne màleeta manene.” Ùvwa ùmòna anu ne lutàtu.

50 Ùvwa mu bùlokò, ne kulòmbayè Mukalenge bwa kumwondopaci. Ki kuMukonkayè misangu yisatu. Kàdi Mukalenge wàkamba cinyi? “Ngàsà Wanyì mmukùmbàne, Pólò.”

51 Pólò kwambayè ne: “Dìbà adi nénditumbìshilè mu mateketa àanyi.” Bwalu, wàkamba ne: “Bwa nciikadi ngálwa kudìbàndisha kumutù kwà bùngì bwa Dibuuulula, ndi mupèèshìibwe mùsànjeelà wa dyabùlù, dyèbà mu mubidi, dìntuuta bisùsù dyàmbakaja.” Ùvwa mwa kudyùmvwakù bìmpè bwa cikondo, ne pashìshe bibangulula.

Kutuuta kwambakaja mbwena kwamba ne “cisûsù pa cisûsù.” Mùdi màzuwà pa mbù, nudi bamanyè’s, mavwala àdi ààtuuta àmbakaja, nwamònu’s, cisûsù pa cisûsù.

Nenku ùvwa mwa, ùvwa mwa kuumvwa bìmpè, kàdi pashìishe ùbìpeta cyàkàbìdì; pashìishe ùmvwa bìmpè, ùbìpeta cyàkàbìdì. Kwambayè ne: “Mukalenge, mbwalu kaayi ebu’s, Kùyi unguumushakù cintu eci?”

⁵² KwambaYè ne: “Ngàsà Wanyì mmukùmbàne, Pòlò. Tùngunukà anu kutùngunuka.” Cìvwa anu citùngùnùke. . .

⁵³ Kwambayè ne: “Mpindyewu, bu—bu mèmè anu mupwàngàne, ne byònsò bipwàngàne,” yèyè ne, “dìbà adi mèmè mutùngùnùke, kaa, nùnkù’s ndi mudyùjè ne mwambè ne: ‘Nudi numòna’s, ncyèna ne bubì to. Mukalenge ùdi ùnkùba’s, mwanèètù. Aleluuyah!’” Dìbà adi’s udi udìvwiya mwakàne ku wèwè mwine.

⁵⁴ Bikèngela Nzambi àkupèèshèku kaacintu kampànda, ku musangu ne ku musangu, bwa kukutuuyishakù ndambù, udi mumanyè’s. Aci ncyà bushuwa. Ùkufukishakù ku dyumvwa ne Yèyè ngudi Sheefù. Kaa, Yèyè kì ngwa ùkèmesha anyi? Eyowa’s, mukalenge, anu butùmbi’s!

⁵⁵ Pa nanku yèyè, Pòlò, dìbà adi, mòna’s, paanyimà pàà mumanè kwenza dilabula dinene edi. . .

⁵⁶ Mpindyewu, bu ne ùvwa mmuntu kampànda leelu ewu, nùnkù’s mwambè ne: “Kaa, Nzambi àbeneshiibwè’s wè, aleluuyah. Balùmyànà, Mukalenge’s mmungenzèle bwalu kampànda! Butùmbì kùdi Nzambi’s wè!” Kàdi kì m’Pòlò to; yèyè ùvwa mumanyi wa dibàla wa Bible.

⁵⁷ Dilabula adi didi ne cya kukùmbanangana ne Dìyi dya Nzambi. Eyowa’s, mukalenge. Dyòdì kadiyi anu menemene dipàyàme mu Bible. . . Kabiya anu kutàpa cyanààna dísù *apa*, kwamba ne: “Kaa, eyowa’s, s’ki cyôcì eci apa mene. Nzambi àbeneshiibwè, ngààMupeci.” Huh-uh. Awu kì mmushindu wùdi Nzambi ùMufila nansha.

⁵⁸ Cìdi ne cya kwikala Bible mujimà, Yèyè yònsò. Bwalu, udi mwa. . . Beena dyabùlù bàtu bàkwàta mudimu ne Bible ewu bu ne mpàà kukòkelangana. Kàdi nebàngatè kaaMufùndu kakese *apa*, kubuulula apa ne kwangata kakwabo kakese *apa*, kuteeta kutùtwàngaja, pààbì biikàle byena-bwalu bibidi, bishiilàngàne anu menemene. Pa nanku, bùdì naabù mbwà kwenza ne Mufùndu wùkumbananganè ne Mufùndu.

⁵⁹ Mùdi Yeshàayi mwambè, mu nshapità wa 28 ne: “Cìdi ne cya kwikala mulongo pa mulongo, mulongo pa mulongo; kakese apa, kakese pààpa.” “Kwàtaayi bikolè ku cìdi cìmpè.” Nwamònu’s, ki mushindu wùdi Cì cilwa’s: mulongo pa mulongo pa mulongo, Dìyi pa Dìyi, Mufùndu pa Mufùndu. Bìdi ne cya kukùngwila byònsò pàmwè. Kì bwa cinyi, ngeela meeji ne,

mu màleesònà a bwena atùdi tulonga mpindyewu aa, ncintu cinène bwa ekeleeziya, bwalu cidi cibáfíkisha ku mushindu wà Mifùndu yònsò yìswíkakana pàmwè. Nenku dilabula dyetu didi ne cya kuswíkakana ne Mufùndu awu. Kaa, s'ki cyôci eci! Bwa cyanàànà, apu ncyà mafi.

⁶⁰ Ne mushindu mwine wùngààkendà bidimu ne bidimu, nciyi mmanyakù ne Bukènkè bwàkatuutà Pòlò panshi abu bùvwà ncinyi to. Pàdibi ne, bantu bàà pambèlu, Mifùndu. . . Bantu, bayiishi kuteetabò kungambila ne: “Abi mbya dyabùlù. Mòna’s, wèwè’s newikalè mwena lubùkù. Newikalè mwena lubùkù. Kùbwelakanyi ne Aci to, Billy. Kùdi cintu cibi mu Cyôci aci. Kwènjikù nanku to, mulùmyànà. Abi mbya mafi. Awu ndyabùlù. Ee, mulùmyànà, wèwè newikalè mutempi wa mbùku anu wetù ewu. Newikalè mwena lubùkù wèwè mudìdinge mwenzè aci. Kaa, byònsò abi mbya dyabùlù. Kí—kí mbya cya bushuwa to.” Kàdi pàvwà. . . Nciwva muswè kuyiishakù abi to.

⁶¹ Kàdi anu mùvwàbi mu njila wa ku Damàsèkè, Pòlò kàakaswà kubiyiisha to, too ne pààkalwàye kujandula ne bìwva mbya cya bushuwa anyi mbya mashimi. Ki kuyayè mu Arabie e kwenzamù bidimu bisatu, ne kulongayè Mifùndu. Aa! Pààkaalukilàye, kwambayè ne: “Mpindyewu binguumùshaayaaku.”

⁶² Kumanyayè ne ùwva ne cya kukùngamangana ne Bàfaalèsà. Ùwva ne cya kukùngamangana ne Basadokà. Ùwva ne cya kukùngamangana ne bàà pa buloba, ne bàà Bisàmbà bya bendè. Ne pa nanku Pòlò, Bible ewu mmufùnda, Mukàndà wa Ebèlù ewu, mmufùnda mu kiipàcilà aku. Ùdi ùnyùkusha beena Ebèlù abu, ne wàngata Dipungila Dikùlukulu adi ne ùDileeja mu Dipungila Dipyadìpyà emu. “Ki Nzambi n’Yèyè ewu,” mwàkambàye, “n’Cyôci eci, pa—pa bapròfetà bònsò ne byònsò.” Ùdi ùbangila ku cibangidilu, nshapità wa kumpàla utwàngàci awu ne: “Bwalu Nzambi mu bikondo bya kale, kalekale wàwa mu cikondo cya kale, mu mishindu mishilèshilàngàne, wàkaakwila ne baataatù kùdi bapròfetà.” Mushindu awu ki wàkatwàlà Nzambi mukenji Wèndè, muteeta kùdi Ulimà-Tuumimà. “Kàdi mu ditùkù edi mmwakwile neetù ku Mwan’Èndè, Kilisto Yesu,” muteeta kùdi Bible Wèndè. Ki bwalu mbwòbù abu’s.

⁶³ Pa nanku malabula aa àdì bàà pa buloba bàmba ne: “Kaa, s’mbya mu meeji. Mòna’s, muntu nansha umwe. . .” Pààkamwènekà Mwanjelo awu, Bukènkè abu ku musùlù eku, pàngààkayiisha ditàbuluja dyànyì dya nzànzànzà mu disangu emu, twètù kubàtiiza bantu bònsò abu. . . Ngeela meeji, Mwanèètù Fleeman, wèwè nguvwa mufwànyine kwikala mu. . . Ncyèna mumanyè ní uvwapù musangu awu awu anyi ní kùvwapù. Mbanganyì bàvwàpu pàà—pààkamwènekà Bukènkè abu pa musùlù apu? Kùdikù muntu wa ku beena kale mwab’ewu anyi? Eyowa, bàmwè bàà kùdìbo. PààkapwekàBu, ku musùlù eku.

64 Kàdi bòbò bàvwa bàmba ne: “Cìvwa anu lumònù lwà mèsù bitaayitaayi cyanààna.” Bààbùngì bàà kutùdi bàvwa biimànepù, baBùtàngìle, kàdi ki Bwòbù bùvwà bupwekè ebu. Ki pashiishe paanyimà pàà bidimu, Nzambi kuCìshindikilaYè ku dísù dya cyamù cya fòtò. S’nCilelèlà.

65 “Ee, cìdi—cìdi mbwalu kampànda bukwàtakaja, anyi ncintu kampànda cìdi—cìdi...?” Bwàl’à’s, mukalenge. Tudi tucyàngacila anu mu Bible emu tunùleeja. M’Mukalenge Yesu umwèumwè awu. N’Yéyè udi wenza cintu cìmwècìmwè aci. Cyenzedi Cyèndè ncyòci cìmwècìmwè aci. Bukolè Bwèndè mbwòbù bùmwebùmwe abu.

66 Tàngilàayi, dyàlumingu dishààle, kaaba aka. Kuntu kwàka, mulàadile mu bulàalù bwànyì, ncìvwakù mwanjì kumòna muntu mulùme awu to kacya bàndela. Mémè kupàtuka kwamba ne: “Kùdi muntu mulùme ku tabernacle, ne ùdi ne mvya, nsukì mifiike, yènda yìlwa mvya. Ùdi mpofo, ne kàyi mwa kwenda to. Ùdi mu dikalù dya balèma. Muntu mulùme wa nsukì mifiike ngudi mumutùme kaaba aka; nngàngàbukà, Ngàngàbukà Ackerman, muntu wa nsukì mifiike, mwena Katolike. Mutùme muntu, musòmbe mwaba wàwa mene. Nenku EMU MMÜDÌ MUKALENGE WÀMBA,” kujuukayè, kupàtukayè wènda wènda mwikàle ne lumònù lwèndè ne bikwabo byònsò. Ncinyì cìvwà cyenzè nanku awu aci? S’ki Mwanjelo umwèumwè awu ewu. Umwèumwè wàkabyànkula Pòlò panshì, pàvwàye mu njila mutàngìle ku Damàsèkè awu, ùdi ne mwoyi mu Ekeleeziya Wèndè ne mu bantu Bèndè leelu ewu. M’Mufùndu wùpàlakana ne Mufùndu. Ki mùdìbi ne cya kwikala.

Kaa, twètù tudi ne bàà *civùmvù*’s. Netùbwele mu cyòci aci, paanyimà pàà mutanci.

67 Kaa, s’tudi ne cintu cya ndòndò kumpalà kwetu, bu twètù anu mwa kubwelamù, leelu ne dilòlò edì. Mpindyewu cikaadi cyènda cibwela mu màyi a ndòndò. Mwaba wùdi . . .

68 Nudi bamanyè’s, pàncìvwà mwànà mukese, mvwa ne kaacijibajiba kakese kumfundu kwa nzùbu, ne mvwa nyakù. Ne twètù bònsò bàna bakese tuywa tudyèlamù, butakà; bàna batekète’s, bàà bidimu biipacila ku bisambombo, anyi mwandamutekète nanku awu. Nenku tuvwa . . . Màyi awu àvwa ne bwondòke bwà bu nùnkù ewu. Kaàvwa mondòke kutàmba bitoci bya ngulube to. Ne mvwa ne kashèètè kàà nsàbangà mwaba awu. Mvwa ndeejangana mùmvwà mwa kudyèlamù; ndikwàta ku dyùlù, ndikùmamù, nya nùnkù ewu. ne kaadifù kàànyì kakese aya kàvwa kàkatuuta mu bitoci, nudi bamanyè’s, ne bivwa anu bivwa nseke yònsò. Mémè kwambila papa ne mvwa mumanyè kwowela.

69 Kwalukilayè naanyì kuntwaku dínghà ditùkù. Kwambayè ne: “Ndi muswè mmonèbi túng mùdì wowela.” Mémè kutùpikapù,

nudi bamanyè's; kuumusha bilàmbà, mu kaacikùtùkùtù kakese kàà tuumici twà robiniers; ki kwasa lubilu, kudikùma mu mâyi. Mêmè kubanga kusàmpula bitoci, bitùpika biya nseke yònsò. Papa pèndè musòmbè pa kaamunkoloji mwaba awu. Kusòmbayè mwaba awu ùmbandila munda mwa ndambù wa tusunsa. Yèyè ne: “Pàtukà mu ciinà cya mâyi aci, ùkoowè mâyi, wàlukilè pambèlu.” Nwamònu anyi?

⁷⁰ Ee, bìdi anu bu mushindu awu's, bwa bàmwè bàà kutùdi bàdi bàdibìkila mutùdi beena Kilisto. Tudi tukalabila mu bitoci. Neya bushuwa. Paùcidi anu mwelè lwongò ne: “Mêmè ndi Methodistè. Ndi mwena Mpenta. Ndi Presbytèrien. Ndi ne cileeeji; ndi muMupetè.” Cyùdi udi ukalabila mu bitoci.

⁷¹ Dìngà ditùku mvwa ne tààtù mukwabo. Mvwa anu ngenza kumwambila. . . Ùvwa ne bidimu bu dikumi ne bitaanu, anyi dikumi ne bisambombo nanku awu. Tuvwa ku musùlu. Mêmè ne: “Papa Lark, mêmè's ntu mumanyè kwowela's.” Piine apu mêmè musòmbèle mundekeelu mwa bwàtù, nudi bamanyè's, ndyùmvwà bilenga ne mu dikùbiibwa. Kwangatayè anu nkahi e kunsàkilayè, mu mâyi a bwondòkè bwa bwipacila mètres asatu. Cintu kushìilanganaci díbà adi's; disàmpuka dyònsò ne mbilà mikolè ayi, ya kacya bàakulela kùyikù mwanjì kuumvwà to.

⁷² Dìngà ditùkù dyàkusàkilàbo, bikèngela ùmanyè paùdi mwimànyìne's. Eyowa's, mukalenge. Pawikalà muMumanyè, newikalè. . . Mbìmpè wikalè muMumanyè menemene. Neya bushuwa.

Kàdi mpindyewu tukàadi tubwela mu mâyi a ndòndò, mu mâyi a ndòndò, mwikalàci mwà kukufwisha mu mâyi wèwè kùyì—wèwè kùyì mwena Kilisto mwìmpè, wa maanyi to.

⁷³ Mònaayi Díyì. Pòlò, yèyè wàkanji kupeta aci. Kwalukilayè mu Dipungila Dikùlukulu, ne kupetayè eci. Wàkamòna dilabula dyèndè adi, kakùyì mpatà to. “Mpindyewu Cyàkambyànkulà panshì aci cìvwa ncinyì?”

⁷⁴ Cìvwa m'Bukènkè, Bukènkè bunene bwimàne mwaba awu, bùkenka bu díbà, bwimàne kumpàlà kwèndè. KwambaYè ne: “Shawùlà, Shawùlà, udi uNkèngesha bwa cinyì?”

⁷⁵ Yèyè ne: “Mukalenge, Wèwè udi Nganyi ùndi nkèngesha?”

⁷⁶ Yèyè ne: “Ndi Yesu.”

⁷⁷ “Mêmè mvwa ngeela meeji ne Yèyè ùvwa mu—muntu, uvwa ne byanza ne bibangu, mùdìbo bàmba ne mmùdiYe ùmwènèka mu masangisha mpindyewu amu, mwikàle ne bibangu bya misonso mu byanza Byèndè ne ku mutù Kwèndè.” To, to; kí ng'awu mubidi to, kí mmu awu mubidi to. Nwamònu anyi? Yèyè ùdi Bukènkè mpindyewu. Shawùlà. . .

⁷⁸ PàvwàYè pànu pa buloba, Wàkamba ne: “Ndi mufùme ku Nzambi. Ndi ngaalukila ku Nzambi.”

⁷⁹ Yéyè ùvwa Mwanjelo uvwa mulombwèle bânà bàà Izaleela mu bwòbù Bukênkè ebu awu, mu cipèèlà. Ùvwa mwalùkile mu Bukênkè abu. Ne Pòlò wàkaBùmòna, mu Dipungila Dikùlukulu. KwambaYè ne: “Ndi Yesu, Mwanjelo wa Cipungidi awu.”

⁸⁰ Nenku Yéyè ùvwa mulwè mubidi, bwa kutùpikula. “Kààkangata mmwènekèlu wa Banjelo to,” mutùdi tusangana mu nshapità midyànjidile, yitùdi tulonga eyi. “Kààkangata ngiikàdilù wa Banjelo to, kàdi ùvwa wa Dimiinu dya Abraham,” bwa Wàmòna mwa kumanyiibwa, bwa bantu *kumònabò* Nzambi. Amen.

Mpindyewu Ùdi wàmba ne: “Nèngààlukilè ku Cyôci aci.”

⁸¹ Nenku pààkamònà Pòlò Cyôci aci, wàkamba ne: “Bushuwà, ùvwa n’Yéyè. Ùvwa n’Yéyè.”

⁸² Peetèlò wàkenza dilabula bufùkù kampànda pàvwàyè ùsambila. Bukênkè bùmwèbùmwè abu bwàkabwela mu nzùbu amu, kukàngula biibi kumpàlà kwèndè, kupàtuka mu misèèsù. Ki Peetèlò kwelayè meeji ne ùvwa ùlòòta; ùvwa mulaabibwe bikolè. Kàvwa mumanyè ne ncinyi civwà cyenzeke to. Kwambayè ne: “Ndi mfùma ku ditàbuluka ku tulù anyi? Kàdi’s nyewù nsanganyiibwa pambèlu apa mu mùsèèsù.”

⁸³ Ki kuyayè too ne kwà Yone Maakò. Ki mwànà mukese wa bakàji awu kuunzululayè ciibi, nsongààkàji wa citende kuntwaku, bàvwa mu disangisha dya milòmbò. Muntu kampàndà ùkookola ku ciibi. Kuunzululayè ciibi. “Kaa,” mwàkambàye, “s’ki Peetèlò ewu mpindyewu mene. Pèènù munkaci mwa kusambila bwa kupàtukayè mu bùlokò’s. Mukalenge wàmusùngidi.”

⁸⁴ “Kaa,” mwàkambàbo, “tùngunukàayi.”

“Éyi Mukalenge, musùngilèku!”

⁸⁵ “Mòna’s,” mwàkambà nsongààkàji awu, “s’mmwimàne ku ciibi, ùkookola.”

Peetèlò mutùngùnùke anu ne kutuuta: “Kàngulàayi mbwelè’s.”

⁸⁶ “Kaa,” mwàkambàye, “s’m’Peetèlò.” Mu matùkù awu, bàcidi anu naabi’s, kàlè kakese kàà dikòka aku. Kaacijikù kakese apa, ujuula ne utàngilà pambèlu, nwamònu’s. Kumpàlà kwa kubweja mwenyi webè, bikèngela ùmanyè ne nganyì mwine udi ukookola ku ciibi cyebe awu. Bwalu, bàvwa ne bìvi; wèwè muunzulùle ciibi, mbafwànyine kukushebeya.

⁸⁷ Pa nanku, kuunzululabò ciibi. Mwànà wa bakàji awu kwambayè ne: “M’Peetèlò.”

⁸⁸ Bòbò ne: “Kaa! Kaa, ekèlekèle, yéyè’s mmufwè. Awu mmwanjelo wèndè udi mwimàne apu awu. Nwamònu anyi? Ùkaadi mubwelè mu mubidi wèndè mutùmbishibwe, nudi bamanyè’s, tèofànì awu.”

89 Nudi bavùlùke mutùvwà baCyǎngàte, Mbongò munene awu, mùvwàYe ùfla Bukènkè, mwàkaalukilàBu kwòkù aku amu anyi? Kùdì . . . “Ntentà wa pa buloba ewu yèyè munyangùke, tukàadi ne mukwabo mwindile.”

Nenku bàvwa beela meeji ne Peetèlò ùkaavwa mumanè kufwà, mubidi wèndè wà kale awu mumacisha, ne bàvwa mwa kuwùjiika mu ndambu wa matùkù, ùkaavwa mubwelè mu mwanjelo wèndè, anyi mubidi wèndè mutùmbishiiibw- . . . Kì mmubidi mutùmbishiiibwe to, kàdi mu tèòfànì wèndè, mubidi wùkaadi mulongolola awu. Kì mmufwànyine kukulabula ku cyanza to. Kawèna ne byanza bya kulabalangana naabi to, nunku ewu, kàdi wùdi mu cimfwànyì cya muntu. “Mmulwè, ne ùvwa munkaci mwa kukookola ku ciibi.”

90 Mwànà wa bakàji awu ne: “To. M’Peetèlò. Mmwimàne mwaba wàwa.” Kuunzululayè ciibi e kubwelayè. Ki yèyè awu mwaba awu. Mpindyewu, Peetèlò wàkasùngidiibwa kùdì Bukènkè ebu.

91 Mpindyewu, mushindu wùmwèwùmwè wùvwà wà ku cibangidilu . . . wùvwà Pòlò, mu Ekeleeziya wa ku cibangidilu awu, mumòne mùvwà Bukènkè bwa Nzambi bwàkateemenà Pòlò abu, Cintu cìmwècìmwè aci ncilwè. Mpindyewu, bantu bàdi mwa kwamba nì ncinyì cyònsò, aci kaciyèna cyèna anu ne cìikalè cilelèlà to. Kàdi pàdi Nzambi ùjaadika cintu kampànda, cyenzedi cyàCì cìdi cìCìjaadika. Pashùshe, cyamù cya fòtò’s cìdi cìCìjaadika. Ne byònsò bitùdì . . . bìdi Mukalenge mwenzè, kakùyi mpatà to, mbijaadikiibwe kabiyi bipangila to ne Cìdi n’Nzambi, ku Mifùndu, ku cyenzedi cyàCì, ku dilabula. Kàdi kì mbaswè kutèeleja to.

92 Tàngilàayi mu tabernacle ewu. Mpindyewu, vùlukàayi ne, nudi bamanyè eci. Katwèna tujinga mìntùtà ya bantu nansha. Katwèna ne mwaba wà kubàtèeka to, twamb’eku twamb’eku. Kàdi, tàngilàayi. Disangisha dya mushindu ewu, mutùvwà tudisangisha bwa cyòci eci, bivwa bikèngela kukòkadi ntèmà ya Falls Cities. Kàdi bòbò mbafwè. Mbafwè kakùyi mpatà to. Bàdi ne mèsù kàdi kabèèna mwa kumòna to.

Udi wamba, wèwè ne: “Mòna’s, Mwanèètù Branham, kì mbaswèku kuya kwà ngàngàbukà bwa kulongolwèsha mèsù àbò anyi?” Yèyè kèna mwa kulongololakù alu lumònu to.

93 Yesu wàkamba ne: “Bu ne nuvwa baMmanyè Mémè, nùnkù nudi bamanyè ditùkù Dyànyì.” KwambaYè ne: “Nwènu Bàfaalèsà bampofò. Nudi mwa kujingulula mmwènekelu wa maulu, kàdi bimanyinu bya cikondo, kanùyi mwa kubìjingulula to.”

94 Aci cìdi cinùpìcila pamutù anyi? Tèèlejàayi. Tàngilàayi bimanyinu bitùdì tusanganyiiibwamù ne mwoyi kaaba aka. Mpindyewu, kì ng’anu . . . Ndi, mèmè mwine, ndi anu muntu, ncyèna nansha muyiishi to, bwa baswè kwamba. Ncyèna ne

kàlaasà kalonga to, cìdì bàà pa buloba bàbiikila ne, “mmuyiishi” aci. Bya bwalu twètù tudi anu bantu balanda bèètù aba. Anji tàngilààyi anu citanda citùdì tusanganyibwamù. Tàngilààyi maakàtèdralè, mu dinda emu. Kàdi tàngilààyi mwaba wùdì Nzambi ùsanganayibwa. S’ki cintu ncyôci aci.

⁹⁵ Ki mùvwà kabidi Moàbà mwimàne mwaba awu mu dibàlakana dyèndè ne bulenga bwèndè abu, kàdi’s ki Izaleela wàwa mu ntentà. Kàdi Nzambi ùvwa penyì? Ki musùmbà wà tunsantu tukese tubùnguluki twà mu malaba kuntu kwàka twàtwa, twènza byònsò bìvwàku bya bibi abi. Kàdi Baalàmà, mwepiskopo wabò—wabò awu, ùvwa mupangè mwa kumòna Lubwebwe lutuuta alu, Nyòka wa cyamù cya Kabanda awu, Dikunji dya Kapyà adi. Mèsù èndè àvwa mafòfòme. Kàvwa mwa kuCimònakù to. Kwambayè ne: “Bòbò bàdi anu bàdìfwànyikijilaCì cyanàànà.” Kàdi Yèyè’s ùvwakù.

⁹⁶ Nzambi àbeneshiibwè, kaa, Yèyè’s ùdi kaaba aka! Nzambi ùdi kaaba aka, ne Ùdi munkaci mwa kwenza cintu cimwècimwè citùYe mwenze aci. Ne Yèyè mmusw-...Tudi tupàlakaja Mufùndù ne Mufùndù. Kacya Nzambi kàtukù muDìzòlèle cintu kampàndà cya cinène, pa buloba apa to, kàdi Ùtu misangu yònsò anu musòmbèle munkaci mwa bantu bàà pàtupù ne badìpwekèshe. Nenku’s ki Yèyè ewu mu dinda edi, wènza cintu cimwècimwè aci. Mifùndù yìdì yìCishìndika. Cyamù cya fòtò cìdì cìCishìndika. Mpindyewu, aci, cìdì cyènza ne ndeedilè ku cimfwànyì aci, kì nne bwalu ndipù to. Mèmè ndi—ndi anu ngènzàmpèkààtù wetù ewu, musùngila ku ngàsà, bu nwènù. Kàdi cìndì nteeta kwamba, cìdì ne, Cìdì m’Bwikadi Bwèndè bwikàle neetu. Ki cintu cya mushinga ncyôci aci. Ee, bu ne Yèyè ùvwa mungenzè Elishà wa—wa mwandàmùke mubidi, bu ne kanùvwa ne diitabuuja dya kuciitabuuja to, kacìvwakù cifwànyìne kunùkwàcisha to.

“Yèyè wàkalwa kùdì bàà Kwàbò Sungasunga, bàà Kwàbò Sungasunga kabààkaMwakidila to.”

⁹⁷ Ki kabingilà nkòkò aku, mu cimenga eci leelu ewu. Mòna’s, ndi mufwànyìne kubanga ditàbuluja kaaba aka, mu citanda kampàndà cya cinène anyì cintu kampàndà, nciyikù mufwànyìne kupeta bantu bààbùngì bwa kuciitabuuja to. Kabààkuciitabuuja anu mene to. Kabèèna mwa kuciitabuuja to. Dyabo ditùku ndimanè kupìta.

⁹⁸ Dileesònà dìmwèdìmwè edi, mu dinda emu, mu Afrike, ndifwànyìne pàmwàpa kupàtula bantu binunu dikumi, bòbò bakese, misùukà binunu dikumi yilwa kùdì Kilisto; pàdiku kufwànyìne kwikala ngènzàmpèkààtù umwepele musòmbè kaaba aka mu dinda emu, anyì cintu kampàndà, muntu kampàndà wa mutwè cimpingà. Bààbùngì bàà kùdìbò bàdi anu bàà bakèbùlùle bakèbùlùle, too ne mùdiku kùjika. Kwajiki.

⁹⁹ Kàdi citùdì tuteeta kwamba, ncyà ne, Mufùndu wùdi wùpàlakana ne Mufùndu. Mpindyewu, nansha dilabula diikàle dinene bìshi, dyôdi kadiyi dikùmbanangana ne Mifùndu to, ndya mafi.

Ulimà-Tuumimà, mupròfetà nansha byòbì ne ùvwa mwîmpè bìshi, yèyè mwakùle kàdi makênkè awu kaàyi mapenyè pa Ulimà-Tuumimà to, civwa cya mafi. Cilòòtà nansha cimwèka cîmpè cya bìshi, cyòci kaciyi cipenyè bukênkè pa Ulimà-Tuumimà apu to, civwa cya mafi.

Pàakajikà bwakwidi abu, Nzambi wàkabàndisha Bible Wendè. Pòlò mmwambè ne: “Mwanjelo wa mu Dyulu mulwè,” Ngalàtiyà 1.8, “ne muyiishè evanjeeliyo mukwabo nansha wa bìshi mushiilàngàne ne unùkaadi bayiishiiibwe, èdiibwè mulawu.”

¹⁰⁰ Mwanjelo wa mu Dyulu wàkambila Yone mubuuludi, uvwa Nzambi Yèyè mwine awu ne: “Mémè Yesu ndi mutùme mwanjelo Wanyì bwa kushindika, anyì bwa kuleeja maalu aa.” Yèyè ne: “Muntu nansha yèyè nganyi musàkidileKù díyi dimwe, anyì muumùshileKù Díyi dimwe, cyòci cîmwècîmwè aci necyùmushiibwè ku Mukàndà wà Mwoyi, bwèndè yèyè.” *Eci ki Cyòci aci, Bible.*

¹⁰¹ Ki bwa cinyì, malabula aa ne bintu bitùdì tumòna byènzeka kaaba aka ebi, bu kabiyi bishindikiibwe kùdi Díyi dya Nzambi to, nùnkù mbya mafi; cidì cifwànyine kwenzeka nansha ciikàle cinyì, nùnkù ncyà mafi. Pa nanku mbya mu Mifùndu, Bulelèlà bwa kabùyi dyela mpatà to. Kaa, ndi ne disànkà dyàbùngì be mündi cidimba cya Mubidi munene wà Kilisto.

¹⁰² Mpindyewu, tuyaayaaku mpindyewu, tukàadi tupweka ku dileesòná. Mpindyewu, tuvwa bajikijile apa pàdiye mwambè ne: “Bu mutùdi banyùngulukila. . .” kî . . . Mfwilaayikù luse. Mbwena kwamba ne, mvwa ntèèla nshapità wa 12. Mvwa mumubalè, kàdi ncyèna mwanjì kumulonga to. Ndi . . .

¹⁰³ Mwanèètù Norman, musòmbèle kwànyì kumbèlu aku, ne mmumanyè ne ndi mufùme ku difika anu makèèlèlà awu, ne bânà bèètù mbamanyè, kuntwaku ne, ncidi mvwilakù. Musangu wùmwèpelè wùndiku mufikè ku dibala Mifùndu, mpâmvwà musòmbè kaaba aka apu, kwènji ndambù wa tusunsa. Ncyà bushuwa. Ncyèna ngUlonga to, ndi anu ngindila bwa Nyuma Mwîmpè àWùmpèeshè anu mùdiYe Yèyè muciswe amu. Yèyè ngudi mumanyè mwaba wùdi—wùdi muntu awu, udi ukèngela bwa kuWùpeta awu. Pa nanku mémè ne cintu cimana kulongolola mu meeji cingìikalà mwa kwamba, díbà adi’s ncibi. Kàdi mémè anu muMulekèle Yèyè ùcyènza, Yèyè neàWùtèèkè anu buludì mu mwaba wùdiWu mukùmbànyine. Nwamònu anyì? “Kanùdyèlèdi meeji bwa cinwikalà mwa kwamba to, bwalu Kì nwnènu bàakulà to, N’Taatù wenù udi musòmbèle munda mwenu. Yèyè ngudi wakula.”

104 Mpindyewu, nshapità wa ndekeelu, nshapità udi mudyànjidile awu, tuvwa bumvwè eci, ne: “Mmunyi mutwàpàndukà, twètù balèngùlùle lupàndù lunene elu; Lwàkatùyiishàbò dyàmbedi kùdi Mukalenge Yesu, ne Yèyè pàmwè ne aba bààkaMutèèlejà?” Bintu bimwèbimwè byàkenzà Yesu abi, bwa kuleeja, bintu bimwèbimwè bu mùdi bìdi byènzeka mwaba ewu ebi: Mwanjelo umwèumwè wa Nzambi awu, byenzedi bimwèbimwè abi, cileeji cìmwècìmwè aci, bintu byònsò anu bimwèbimwè abi, byònsò dîbà dyònsò, Evanjeeliyo umwèumwè awu, mwikàle anu ne Dîyi. “Pìikalàbi ne cyàkayiishiibwa kùdi Mukalenge, pashiishe cishìndikiibwe kùdi bayiidi Bèndè batùdi twètù batèèleje,” Pòlò mwikàle umwèumwè awu, “mmunyi mutwàpàndukà, twètù balèngùlùle lupàndù bunene nùnkù?”

105 Mpindyewu, Pòlò ùvwa wàmabila cyòci aci batèèleji bèndè bàà beena Ebèlù. Mpindyewu, bòbò kabàvwa ne bisanji bya dikwàta naabi mèyi to, mutùdi twètù naabi leelu ewu emu, kaaba aka. Kàdi bàvwa ne bafùndi bàvwa bàsòmba mwaba awu, bàCìfùnda anu mùvwa Pòlò ùCìyiisha amu.

Ne ki Cìdi apa mene eci. Twètù tudi tuCìkwàcila ku bisanji bya dikwàta naabi mèyi, ne mikàbà ya mèyi eyi yiyaaya pa buloba bujimà, nwamònu’s, bwa kuleeja ne Cìdi Bulelèlè. Wetù ntèndeleelelu kî ngwa pàtupù to, kakùyi mpatà to Ùdi n’Yesu Kilisto mubiike ku lufù, cintu cìmwècìmwè aci. Mpindyewu katwèna ne cya kuMulèngulula nansha.

106 Mpindyewu, kùùmuku anu mu ekeleeziya wàya, leelu ewu, wamba ne: “Ee, mu mushindu kampànda bìdi bìnsànkisha bwa kuyamù. Ntu munangè ngimbilù awu, ne bantu bàtu ne musàngeelelu ku kaèkèleeziyà kàà kale aku.” Kwènji nanku to.

107 Mwanèetu, enza bwa mwoyi wèbè wikalè ludimì lwà kapyà, wenda wamba ne: “Mòna, bikèngela ngènzèku cintu kampànda pa bwalu ebu. Bikèngela mpatukè mmonè ní ndikù mwa kufikisha muntu kampànda ku disùngidiibwa.”

108 Kàdi kùpàtuku, wenda wamba ne: “Nzambi àbeneshiibwè, wèwè kùyi munyingàlè, neùbutukè.” To.

Ndà naabi ne kalolo. “Ikàlaayi ne lungènyi bu lwà nyòka, ne dibènga kwenzelangana bibi bu dya nyuunyi wa nkuci.” Nwamònu’s, ki mwa kuya naabi nanku. Seemènà kùdi muntu awu, yèyè mumunyi wa nzòòlo, yikilà nendè pa nzòòlo, yèye awu, bwa katanci. Nwamonu anyi? Nenukù pashiishe, katanci aka, neùbangè kwakula bwa Mukalenge. Yèyè cidimè, akùla pa ferme wendè awu.

109 Yèyè ùsùmbisha màshinyi a tùdyèndelandelà, akùlè pa màshinyi èndè awu, bwa katanci ne: “Wèwè udi ne màshinyi malenga a dikèma,” ne bikwabo. Nwamònu anyi?

110 Too ne paùdì ubàkula Nyuma, pàdì Taatù wàmba ne: “Mpindyewu dîbà dyàkùmbanyi dya kumulenga pa bìdì bitàngilà musùùkà wèndè.”

111 Udi mwa kucyòya, wamònu’s: “Awu’s mmàshinyì malenga be. Udi mumanyè dyambulangana, leelu ewu, ndilwè dya mushinga wàbùngì. Kaa, mushindu mwine wùkaadi matùnga maseemeja pàmwè’s wè; ne bimenga bya matùngà ètù, biseemeja pàmwè. Bálundà ne baamàmù’s bàdi mwa kukùmbulanganakù. Udi mumanyè’s, ncintu cilenga be bwa kwikalakù ne màshinyì bu aùdì wèwè usùmbisha aa.”

112 “Eyowa’s, mukalenge. S’mmwòmò cya bushuwa. Uh-huh.” Nudi bamanyè’s, mwikàle ùpwidijila mîshì pa cifwankà cyèndè apu, anyì ní mpa cinyi. “Eyowa’s, twòtò etu, twòtò etu’s ntùshinyì twîmpè.”

113 “Ukààdikù mwelè meeji civwa beena kale bafwànyine kwikala beelè meeji bu ne bàvwakù bamòne cintu cya mushindu awu anyi?” Utùngunuka anu ne kuya mushindu awu, udi mumanyè’s.

Paanyimà pàà katanci, neǎmbè ne: “Eyowa, eyo, mmwòmò cya bushuwa.”

114 “Udi mumanyè’s, cikwabo cintu cidìci cyènza, cidi citwàla mutùtù twenza amu, bu mu matàbuluja. Bantu bàdi mwa kufùmina mu ditùngà dijimà, lubilu, bwa ditàbuluja.” Wamònu’s, wèwè ngudi upenga njila awu, dîbà dyònsò, udi mumanyè’s.

115 Wèwè muumvwè Cintu kampàndà cìjìka njila, imànyìnà mwaba awu mene, yilà *eku*. Mwàkambà ngàngàbukà kampànda, mu Phoenix mwàmwa, ne: “Mukalenge, ujàku mukana mwànyì ne mèyi mîmpè, ne pashìishe ntàpèku cizàdi pàdìbi ne bingàmbì abi byàkùmbanyi.” Nudi numòna anyi? Eyowa. “Ntàpèku cizàdi pàdìbi ne bingàmbì abi byàkùmbanyi.”

116 Mpindyewu, mònaayi mpindyewu, netùbangile ku nshapità wa 15, anyì mvensà wa 15 wa nshapità mwi3, ne ntèmà yònsò mpindyewu.

Pàcidìbi byambiùbwe ne: Leelu ewu nwènù. . . bumvwè dîyi dyèndè, kanùpapishi myoyi yenu to, bu mwàkadìbi mu dînyòbola.

117 Mpindyewu tàngilàayi mùdi Pòlò wàkula kaaba aka. Mpindyewu mbyambiùbwe ne: “Leelu ewu, paanyimà pàà ntàntà buleyi.” Netùbwelèmu paanyimà pàà mutanci, ne: “Leelu ewu, ntàntà buleyi.” Ûdi ùbwela mu nshapità udi ulonda awu ne: “Paanyimà pàà ntàntà buleyi.”

. . . byambiùbwe ne, Leelu ewu nwènù. . . bumvwè dîyi dyèndè, kanùpapishi myoyi yenu to, bu mwàkadìbi mu ditùkù dya dînyòbola, pàakayòbolàbo Nzambi apu.

118 Mpindyewu tùbalààyaaku mvensà udi ulonda awu.

Bwalu bàmwè, pààkamanàbo kuumvwa, bàakayòbola: . . .

Mpindyewu ùdi wàkula bwa cinyi? Evanjeeliyo.

. . . ki bwa cinyi kí mbònsò bàakapàtukà mu Èjiiipitù ku bulombodi bwà Mòsà abu to.

Kàdi mbanganyi bàvwàYe muumvwile bibi munda mwà bidimu makùmi ànaayi abu, pìikalàbi ne kí ng'aba bààkenzà mpèkaatù, beena bitàlù byàkapònà mu cipèèlà abu?

119 Twánjàayi kwimanakù apa kakese. *Diyòbola*, “pààkayòbolàbo.” Mpindyewu cyàkenzà Nzambi ncinyi? Mpindyewu ewu m’Pòlò udi uteeta kwakula. Ncinyi Cyàkabàlombolà kupàtuka naabò mu Èjiiipitù? Ùvwa m’Mòsà anyi? To. Mòsà ùvwa ncyamù cya mudimu cya mubidi.

120 Mpindyewu tudi ne pàà kushìndamijila bitùdì twamba kaaba aka. Tudi baswè bwa kulongolodiibwa mpindyewu. Patwàlenga kaaba aka mwab’ewu, mu tusunsa tukese emu, nenù—nenùcimònè.

121 Mpindyewu, Nzambi wàkapèèsha cisàmbà Cyèndè diikisha dya kadiyi dya kaaba kamwè to. Bàvwa mu Èjiiipitù. Kabàvwa mu mwaba wàbò mujaalàme to. Bàvwa pambèlù pàà mu buloba bwàbò. Bàvwa beenyi ne beena lwendu, ne Nzambi ùvwa ne cya kubùumusha mu mwaba wùvwàbo banji kusòmbela, mu—mu Èjiiipitù amu, kuya naabò ku buloba bwàbò.

122 Cifwànyikijilu cya leelu ewu; twètù katwèna basòmbe bajaalàme to. Pànwapa katwàkunènga to. Twànà tukese twà balùmè twà byanza bidyundè ne misunya munkacì mwa kunàya mààbí, twànà tukese twà bakàji ne biipòpì, tùnàya; katanci aka, nukàadi nutòloka mvyà, ne nwela minyèngù. Pànwapa cintu kampànda kacýèna cyènda bimpè to. Apa kí nkwtù to. Tudi mu mwaba wùdi kawùyi wòwò to. Kí bwa cinyi tudi twamba ne tudi beenyi ne beena lwendu. Cintu kampànda ncyenzèke.

123 Inàbànà mukese ùvwa wàmba, mu dinda emu mu cibambalu mwàmwa, mushindu wùdi bantu bàmuseka, mînga misangu. Mèmè ne: “Kàdi, mwanèètù wa bakàji, munanga, wèwè kwèna wa ku bantu abu to.” Twètù tudi cisàmbà cishìilàngàne.

124 Mwanàànyi mukese wa bakàji ùvwa wàmba ne: “Papa, bânà bàà bakàji kampànda mbenzè bintu kampànda bidìbo benzè.”

125 Mèmè kwamba ne: “Kàdi, tàngilà, munanga wanyi,” bàvwa ne maadiskè a misambu yà Elvis Presley eyi, mèmè ne: “Ncyèna muswè bwà kwikalawù mu nzùbù mwànyì to.”

126 Yèyè ne: “Kàdi, papa, s’mbànà bakese bàà bakàji bàà musàngeelu’s.”

127 Mèmè ne: “Bàdi mwa kwikala nanku. Ncyèna ne cintu cibì cya dyamba bwa apu to. Kàdi kùdi cintu cimwèpelè, tudi twètù

bashiilàngàne. Tudi bashiilàngàne. Kí mbwena kwamba ne tudi baswè kwikala bashiilàngàne to, kàdi Nyuma udi munda mwetu mmupàtùke mu byòbì abi. Wèwè udi wa ku buloba bukwabo.”

¹²⁸ Pàndì nya mu Afrike, ncyèna mwa kukùmbanangana ne yabo—yabo—yabo mishindu ya nsòmbelu to. Bòbò kabàtu bàvwàla bilàmbà to. Bàtu butakà. Ne bòbò bàdi bàngula cintu kampàndà cya cibolè, ciikàle ne biinyà munda, bàdi bàcidya, nansha bìshi, kakùyì dishiilàngana to. Nwamònu anyì?

¹²⁹ Kàdi Eci ncishiilàngàne. Nudi bamanyè's, musangu kampànda, tuvwa bònsò mushindu awu, kàdi dishidimuka ndidì ditùfikishe ku diikala bashiilàngàne.

Kàdi dikùdimuna dya mucimà ndivùdijè aci misangu mùlìyò. Katùcyèna kabidi baswè bintu bibolè bya pa buloba to. Kilisto mmutùvwijè beena Kilisto, anu mùdi dishidimuka ditùvwijè ne mankenda emu. Kàdi mònaayi, kí ng'anu aci nkàayaci to, kàdi tudi tujìkula ne tudi beenyi ne beena lwendu. Katwèna bàà pa buloba to. Pashiishe, kwèna muswè cintu nansha cimwè cya dyenza ne bàà pa buloba to. Ne byòbì bintu abi bikaadi bipite.

¹³⁰ Mpindyewu, Izaleela ùvwa ùsanganyibwa mu Èjiipitù mwàmwa. Bòbò kabàvwa beena Èjiipitù nansha. Beena Èjiipitù, cìvwa mbundù bwa mwena Èjiipitù kulengayè byanza pa mukooko. Kàdi beena Izaleela bòbò bàvwa balami bàà mikooko. Kàdi mushindu mwine wùvwà bundù abu ne cya kwikala bukwatè Mòsà, paanyimà pàà dipanga dyònsò dya buneemè bwa kwikala mwena Èjiipitù abu, bamunyi bàà nyama.

Nukàvwakù bamòne cìvwa Pàlò mwambile Yòzefù, ne bikwabo abi anyì? “Ncinyangu.” Wàkamba ne: “Cisàmbà cyenu ncya balami bàà mikooko.” Ne nansha mwena Èjiipitù mwine kàvwakù mwa kulenga byanza pa mulami wa mikooko to. Ùvwa wa cisàmbà cishiilàngàne.

¹³¹ Ne ki mùdibi nanku ne mwena Kilisto, leelu ewu, pàdiye mulediibwe cyàkàbidi. Kabyèna. . . Mbya bukooyà bwa yèyè kalamakana mwaba wùdi bantu bàvwa maalà ne bènza minèkù ya bundù, ne bakàjì butakà. Ne yònsò. . . Aci, cidi—cidi mbukooya. Kaa, Mukalenge àbeneshiibwè's wè! Twètù tudi beena lwendu pànwapa. Tudi beenyi pànwapa. Nyuma mmukùdimuna, ne tudi twenda tukèba Cimenga mùdi bakàjì kabàyi bàvwàla tùpùtulù to. Tudi twenda tukèba Cimenga mùdìbo kabàyi ne binwinù bya maalà a byèrè to. Tudi twenda tukèba Cimenga mùdi bwakànè busòmbèle. Pa nanku, twètù tudi beena lwendu.

¹³² Pa nanku, Nzambi wàkapweka mu dibùlù dinene dya Kapyà, cyenzè bu Kafulu kàà bukènkè, mupwekè ne kavumù mu kaacipuka ne kubanga kuDìbuulula kùdì Mòsà, dyàmbedi. Mòsà kwambayè. . .

S'nudi bamanyè mutùvwà bayiilè dìleesònà adi dilòlòlò adi, mùvwà pàvwà Yesu pànu pa buloba, kwambaYè ne: “Ee,

kumpàlà kwà Mòsà kwikalayèku, NDI.” Awu ùwva n’Yesu mu kaacipuka kàà kàlàkuka kapyà, mu Dikunji dya Kapyà. N’Yesu, leelu ewu, umwèumwè awu.

Nenku n’Yèyè wàkaDibuulula mu Dikunji dya Kapyà, ne Mòsà kwenzayè dilabula. Kuyayè mu Èjiipitù. Wàkayiisha Evanjeeliyo, luumù lwîmpè, ne bimanyinu ne maalu a kukèma bîmulonda. Nudi nucyùmwa anyi? Cintu cimwecimwe aci leelu.

¹³³ Kî ng’anu aci to, kàdi pààkapàtukà beena Ebèlù abu, bèndela mu Bukènkè abu, bàvwa balombòdiibwe kùdi Dikunji dya Kapyà dimwedimwe adi. Ne Bible mmwambè ne: “Kanùteeci Nzambi nansha.”

¹³⁴ Tàngilàayi eci. Ngǎnji ncibalè.

Pàcìdìbi byambùbwe ne: Leelù ewu nwènù . . . bumvwè dīyì dyèndè, kanùpapishi myoyi yenu, (Dīyì Dyèndè dyà mukana diikàle dyàkula ne mwoyi wèbè’s.) bu mwàkadìbi mu diinyòbola. (PààkaMuyòbolàbo apu.)

Tèèlejàayi.

Bwalu bàmwè, pààkumvwàbo, bààkayòbola: . . .

¹³⁵ Mbanganyi bàdiku bamanyè ne beena Izaleela bààkayòbola Nzambi ku bupidyà bwàbò? Bààkanungana, bôbò, anu menemene. Nzambi wàkatùuluka buludì mwab’awu. Ne bônso pààkabwelàbo . . . Cintu cya kumpàlà, bààkabwela mu lutàtu.

S’ki Dikunji dya Kapyà edi divwà kumutù kwabo. Ncyèna mumanyè ní bônso bàvwa bàDimòna, anyi to. Bwa Mòsà kaayi, yèyè ùwva ùDimòna. Ne Dyòdi divwa kumutù kwabo, ne bàvwa bàDitàngila. Ne pààkapwekàbo. . . Twàmbèbi ne kabàvwa bàDimòna to, mèmè ncyèna mumanyè ní bàvwa bàDimòna anyi to. Divwa diya kumpàlà kwabo. Bible mmwambè ne Divwakù.

¹³⁶ M’Mwambè ne: “Mutooto wùwva wùya kumpàlà kwà beena meeji abu.” Muntu kààkaWùmònakù to pa kuumusha beena meeji abu. Wàkapicila kuulu kwà nzùbu ne nzùbu yònsò wa cijoojedi. Bàvwa bàpimina dîbà ku mitooto. Muntu kààkaWùmònakù to pa kuumusha beena meeji abu. Bôbò mbàvwà ne cya kuWùmòna, ne beena meeji abu mbàvwàbo batùmine Mutooto awu.

¹³⁷ Ne Dikunji dya Kapyà adi divwa ditùmina Mòsà, ne Mòsà ùwva mutùmina bânà bàà Izaleela. Ne bôbò bàvwa ne cya kulonda Mòsà. Bàvwa mwa kumòna Mòsà, ne Mòsà ùwva ùmòna Bukènkè abu.

Ki bôbò bàyaaya bàba. Dîbà adi kwasabò lwendu. Nenku pàvwàbo bàpàtuka, bààkafika ku Mbù Mukunze. Nenku, kaa, bàà—bààkamòna bimanyinu byònsò bya bishimà abi ne bikwabo byènzeka pàcìvwàbo anu mu—mu buloba bwa kale bwa Èjiipitù amu, kàdi pààkamùpàtukàbo mu lwendu lwabo

alu, bàcifùminakù ku dikùdimuna dya mucimà ne ku dipàtuka. Pashiishe, katancì aka anyì, kupetabò lutàtu.

138 Nzambi ùtu munangè kukubweja mu lutàtu. Ùtu munangè kjujuula ntàtu bwa kumòna ciwènza pa bwalu abu. Pa nanku Yèyè kwimakaja anu Mbù Mukùnze awu, ne katancì aka anyì, kubàbweja buludì mu mwine mwaba ewu, pashiishe kutùma Pàlò wènda ùlumbatangana naabò. Nudi numòna mùtù Nzambi munangè kubyènza anyì? Yèyè ùtu munangè kuleeja patòòke bukole Bwèndè ne dinanga. Yèyè ùdi Nzambi, ne Ùtu anu munangè kukuleeja ne Yèyè ùdi Nganyì. Amen.

Kàdi lutàtù mu bwalu abu leelu ewu, lùdi ne, bantu bàdi bàmba ne: “Kaa, matùkù awu’s àkaadi mamanè kupita.” Bwàlà. Mmuniyì mùdi Nzambi mwa kuDileeja patòòke, panùdi balongèshìibwe bintu bya mushindu awu? Kàdi Nzambi ùtu munangè kuDileeja.

139 Ki bânà bàà Izaleela bàlwalà aba, bènda bèndela mu Bukènkè. Mòsà, mutùngùnùke ne kuya kumpàlà kwabo. Ki bôbò abu. “Lwâyì. Njila nyèyè ewu. Nzambi ùdi munkaci mwa kubìikila. Tudi munkaci mwa kupàtuka. Tuyààya batàngile ku buloba bulaya.”

“Kaa, aleluuyah!” Ki bôbò aba bônso, bèèla mbilà, ne bàtùpika, ne bàpicila mu cikondo cya dicyònkomoka, nudi bamanyè’s. Kàdi katancì aka anyì, kutàngilabò paanyimà e kwambabò ne: “Kaa, lwàlwa lupwishi ndwà cinyi?”

140 Umwe wa kùdìbo kubàndayè pa kakùna, kwambayè ne: “Kakaa, kakaa! Lekààyi! Lekààyi! S’ncilwilu cya Pàlò’s.”

141 Nzambi kwambaYè ne: “Nudi ne bwòwà nùnkù bwa cinyi? Kanùvwa biitàbùùje ciMvwà mwenzè kuntu kwàka aci anyi? Cinùdi nutàcishila meeji nanku ncinyi? Nudi nuMfiikishila munda cinyi?”

142 Pààkafikàbo kuntwaku, Mòsà kuyayè kabààkwila kùdi Nzambi. Nzambi kukàngulaYè anu Mbù Mukùnze cyanààna ne bôbò kusabukabò; kukangilaYemu mwena lukunà awu. Ki mushindu wùdi Nzambi wènza ngwòwò awu. Kanùkwàciki bwòwà to. Kanùsaluku to. Kanùlubakanyi to. Nudi nuyòbola Nzambi.

143 Pashiishe cyàkenzàYe ncinyi? Mbyenzè bu ne: “Ee, tudi bapetè diteeta dinene dimwèpelè; Nzambi àbeneshiibwè, twaditàmbi bukòlè. Katwàkuàpeta kabidi to. Tudi mu njila batàngile ku buloba bulaya.” Ki kubàlombolaYè buludì ne mu cipèèlà, mùtù kamùyi màyi amu. Nudikù mwa kudifwànyikijila anyi? Nzambi, ne cisàmbà Cyèndè—Cyèndè cijidila, cya cijila aci, wàkabàlombola buludì too ne mu butèyi *ebu*; pashiishe kubàpàtula mu butèyi abu, kàdi kubàlombola buludì mwaba wùdi kawùyi màyi ewu. Pààbì Yèyè’s ùvwa mufwànyine kuyiila naabò njila kampànda kùvwà màyi. Mòna’s, Yèyè’s ùvwa anu mufwànyine kwikala mwenzè musùlù, njila mujimà awu, bu

Yèyè muswè kwenza nanku. Yèyè's ùvwa mufwànyine anu kwikala mwenzè ne mukùna wònsò wùtudikè ne disànka, wùsòmpola mâyi muulu mapite too ne mu mètres dikumi ne ataano, bu Yèyè muswè. Cya bushuwa, Yèyè's ùvwa mufwànyine kucyènza. Kàdi bu Yèyè mucyènzè, nùнку ncitàmbe kupeepela. Kaa, mémè ndi mucìswe! Dìna dya Mukalenge dìbeneshiibwè.

144 “Nzambi wàkalekela *cikampànda* cyènzeka bwa cinyi, Mwanèètù Branham? Bwa cinyi Nzambi . . .?”

Aci ncìdì Nzambi wènza. Mulekèle. Tùngunukà wèwè anu ne lwendu. Aci nciàngile Nzambi. “Makàsà a baakàne mmalombola kùdì Mukalenge.” Eyowa's, mukalenge. Ciine aci cìdì cìshintulula cinyi?

145 “Ndi mujimije mfrangà yànyì yònsò, Mwanèètù Branham.” Ee, Nzambi àbeneshiibwè's, nansha nanku.

146 “Kaa, ndi mwenzè *cikampànda*, ne *cikansanga* ncyènzèke, mvùla wa cipùpù mmuupùle nzùbu wanyì.”

147 Nzambi àbeneshiibwè's, nansha nanku. “Mukalenge nguvwa mufile, Mukalenge ngwangàcì, Dìna dya Mukalenge dìbeneshiibwè.” Tùngunukà wèwè anu ne kuya. Byònsò abi mbwà butùmbi bwa Nzambi. Nzambi mmumanyè cìdìYe wènza aci.

Bàmwè bàpìcila ku mâyi, bàmwè bàpìcila ku nkòkà,
Bàmwè bàpìcila ku diteeta dilulè, kàdi bònsò
bàpìcila mu Mashi.

148 Mushindu awu ngùdìYe ùbàlombola. Ncya bushuwa. Kaa, ekèlekèle! Ndi ndyùmvwa anu bu ne ndi mufwànyine kwimanyika kàdi kwela mikunda's. Mushindu awu ngùdìYe ùlombola bânà Bèndè bananga. Kaa, nudikù ànu mwà kudyùmvwa . . .? Mpindyewu, mémè ncyèna mufwànyikiji wa bintu byà mu meeji to, kàdi nudikù ànu mwà kuumvwa mùdì Nyuma mulenga awu upòngolokela mu citanda cijimà emu anyi? Kàdi bu ne mèsù etu àvwakù mwa kutàbala mpindyewu mene, ne kutàngila bàdì biimàne benda bàlonda bimanu ebi aba, ne mu tujila etu myaba yònsò?

149 Elisha wa kale awu, dinda kampànda, pàvwà nsongààlùme awu mwikàle anu mpofo wetù wa menemene ewu, kwambayè ne: “Mòna beena Suuliyà kuntu kwàka.”

Yèyè ne: “Kàdi bàdì neetu twètù mbàdì mbatàmbe bùngì.”

Awu ne: “Mémè ncyèna mmòna muntu nansha umwe to.”

Yèyè ne: “Mukalenge, kàngulàku nsongààlùmè ewu mèsù.”

150 Dya ùtàngila mu nyùngulukilu wa mupròfeta mukùlàkàjì awu anyi, mu nyùngulukilu mwònsò amu, mikùnà yìvwa yilàkuka Kapyà, ne tubalù twà Kapyà, ne màkalù a mvità a Kapyà. Kutwishiibwayè dìbà adi.

151 Kwambayè ne: “Netùpatukè anu cyanààna kàdi kubàtwa bufofo.” Bòbò’s bàvwa ne lumònù lwabo lupwàngàne anu mùvwàbo naalù kwònsò aku amu, kàdi bàvwa mpofo kabàyi mwa kumumòna yèyè to. Yèyè ne: “Unùdi bònsò nukèba ng’Eliyà anyi?”

Bòbò ne: “Eyowa.”

152 Yèyè ne: “Lwâyì, mèmè nènkanùleejè kùdiye.” Kàdi s’ùvwa nyèyè, wènda ùbàlombola. Bòbò kabàvwa bamanyè to.

153 Ki mushindu wùdìbi nanku leelù ewu. Kilisto ùdi kaaba aka. Nyuma Mwîmpè ùdi kaaba aka, wènda bintu bimwèbimwè bikaadiYe mwenzènze misangu yònsò abi, kàdi bàà pa buloba bàdi mpofo kabàyi bàCimònakù to. Kí mbaCimanyèku to. “Kaa, ncitu—ncitu mumanè Aci to. Wanyì mpaasàta. . .” Kaa, bantu bapèlè bapuuylè nwè! Nudi bamòne cìndi njinga kwamba aci anyi? Mbampofò kabàyi bàCimòna to. Kí mbaCimanyè to. Nzambi ngudi ulombola.

154 Mpindyewu, kulwabò, bàpicila mu Cipèèlà cya Sinà, kamùyì màyi to. Nzambi ùkaavwa anu mumanè kubìlongolola byònsò. Kaa, ki kusanganabò cijibajiba cya màyi, kwambabò ne: “Kí òwò aa.” Kàdi kabàvwa nansha mene mwa kuàlabula to. Kaa, àvwa mabi be. Ekèlekèlè, àvwa —àvwa mabi kutàmba ne lukàmà pa lukàmà lwà soufre. Nwamònu’s, anu mùtù mayì mabolè amu, nudi bamanyè’s. “Kaa, ekèlekèlè! Mmabi be.” Cìvwa mmulungù. Mpindyewu, bàcibìikila ne n’Cipèèlà cya Sinà’s. Mabwè a ngaji àbúngì mmatòlòkemù, ne kasulù kùvwà mabwè awu matòlòkèlè. Kí Mòsà kwambayè ne: “Kanwikadi. . .”

155 Nzambi kwambaYè ne: “Bàdi bènza nanku bwa cinyi? Bàdi bènza nanku bwa cinyi? Cìdìbo bààNyòbwela ncinyi? Èe, piikalàbi ne Mèmè nguvwa mwenzè cyòcì aci kuntu kwàka, Ncyènàku mwa kwenza cintu kampànda pa bwalu ebu anyi?”

156 Piikalàbi ne Yèyè ùkaadikù mukupàtùle mu mpalù umwèpelè wa disaamà, Yèyè kènàku mwà kukupàtula mu mukwàbò anyi? Yèyè’s ùkaadikù mukupàtùle mu lutàtù kampànda, Yèyè kènàku mwà kukupàtula mu lukwàbò anyi? Nzambi àbeneshiibwè’s wè! Piikalàbi ne Yèyè ùkaadikù mumpàtùle mu mpèkaatù, Yèyè’s ùdi mwa kumpàtula mu lukità. Yèyè’s ùdi Nzambi. Bidi bìshintulula cinyi? Tùngunukà wèwè anu ne kuya, ikalà ne mèsù pa Yèyè.

157 KwambaYè ne: “Piikalàbi ne Ndi mukàngè Mbù Mukùnze paanyimà peenu, ne mushebèye beena Èjiiipitù abu mu màyi, Ncyènàku mwa kwenza cintu kampànda bwa màyi aa anyi? Cìnùdi nuMfiikishila munda ncinyi? Kaa, bupidyà bwenu’s! Nudi nuNyòbola bwa Mfiike munda, bwa bupidyà bwenu.”

158 Mpindyewu mwakù wùdìbo bangàte kaaba aka, “Sin,” ngwàkayòbolà. Mwenzè ne. . .Cyàkacyènzèlèbo, mbwalu bààkabènga kwitabuuja. Mpindyewu, bòbò kabààkapàtukakù kuya kanàya mibèlà, ne bintu bya mushindu awu to.

Kabàakendakù ne mukàj'a bendè to, ne kupàtuka kuya kamba mashimi to. Kí ng'aci civwàbo bènza to. Kàdi, mpèkaatù kí ng'aci to, twamb'eku twamb'eku.

¹⁵⁹ Kwenda masandi kí mmpèkaatù to. Kunwà mfwankà, kucyànkunya mfwankà mukana, kunwà maalà, kunàya twartà twà mfrangà, kwelangana milawu, kucipa, ne bikwabo, abi kí mmpèkaatù to. Abi mbyambiìbwà bya bupidyà. Udi ubyènza bwalu udi mwena bupidyà. Wèwè mwikàle mwena kwitabuuja, kwèna wenza abi to. Kí bwa cinyi Yesu wàkamba ne: “Ewu udi utèèleja Mèyi Àànyì ne *witabuuja* Yèyè udi muNtùme awu, ùdi ne Mwoyi wà kashidi.” Kí ngudi *wamba* mùdiye wítabuuja to, kàdi ngudi wítabuujilamù awu! Kí bwalu abu's. Aci's cidi cyùmusha cileeki cyènù cyònsò cya mbangilu aci. Nwamònu anyi? Mpindiyewu, kí bwalu mbwòbù abu.

Kí nne: “Ewu udi utèèleja Mèyi Àànyì ne wèla mbilà” to. Kí nne: “Ewu udi utèèleja Mèyi Àànyì ne wàkula mu myakulu” to. Kí nne: “Ewu udi utèèleja Mèyi Àànyì ne mwikàle ne mashi mu cyanza cyèndè anyi mumpàlà mwèndè” to, anyi ní ncinyi cikwabo to. Kí ng'aci nansha.

“Ewu udi utèèleja Mèyi Àànyì ne wítabuuja Yèyè udi muNtùme awu, ùdi ne Mwoyi wà Cyendeleele, ne yèyè kàadyàkupitakù ku Cilumbulwidi nansha, kàdi mmumùke ku lufù muyè ku Mwoyi.”

¹⁶⁰ Mpèkaatù ncinyi? Bupidyà. Kantu kakese kàdi mwa kajuuka, pamutù pàà kuya buludì ku Mifundu ne kujandula ne nCilelèlà anyi to: “Kaa,” mùdì wèwè wamba, “mèmè ndi. . . To! Wamònu's, mwab'awu, tungunukà. Mèmè nèntungunukè anu ne kwikala Presbytèrien mùndì emu, wamònu's.” Tungunukà, mpofò naanyì we, kàdi's udi uyòbola Nzambi.

¹⁶¹ Pàdì Nzambi wènza cintu kampànda, Yèyè mmuswè bwa ditungà diCikwàtè. Kàdi, pamutù pàà cyòci aci: “Udi mumanyè's, ee, mèmè ncyèna mumanyè Aci to.” Nwamònu anyi? Yèyè mmuswè bwa bantu bàCyúmfwè. Piikalàbi ne bwalu mbukutàngile bikolè, sòmbelà panshi ne Mifundu ayi. Cikenkètè ùCikèbulùlè, mpàla ne nyimà, ùmonèbi ní nCyenzèke, ní nCidyànjlila kwamba bwa kwenzekaci, ne bikwabo. Dìbà adi nèuCyúmfwè. Amen.

¹⁶² Mpindiyewu mònayai.

Pàcidìbi. . . Leelu ewu nwènù. . . bumvwè dìyì dyèndè dya mukana, kanùpapishi myoyi yenu to, bu mwàkadìbi mu diinyòbola, pàakayòbodiìbwà Nzambi kùdìbo, nudi numòna's.

Bwalu bàmwè, pàakumvwàbo, bumvwè evanjeeliyo uvwa Mòsà muyiishè awu, bàakayòbola: kí bwa cinyi kí mbònsò bàakapàtukà mu Èjiipitù ku bulombodi bwa Mòsà abu to.

163 Mbanganyi bàdi bamanyè búngi bwa bantu bàakasungidiibwà mu musumbà wà ku cibangidilu wàkapàtukà awu? Mbúngi kaayi? [Muntu ùdi wàmba ne: “Babidi.”—Muf.] Babidi, mmwômò. Mbanganyi bàdi bamanyè ménà àbò? [“Kaalèbà ne Yoshùwà.”] Neya bushuwa. Kaalèbà ne Yoshùwà, anu babidi abu, pa mìliyò yibidi ne bya mu njila.

164 Tèelejàayi eci. “Kàdi yèyè. . .” Mvensà wa 17 mpindyewu.

Kàdi mbanganyi bàvwàye muumvwile bibi munda mwa bidimu makumi anaayi abu, bwa bupidyà. Kabàvwa ng’aba bààkenzà mpèkaatù, bààkabèngà kwitabuuja abu. . . ?

165 Angàtaayi nkòngamyakù nùsanganè cìdi mpèkaatù ùmvwija. Angàtaayi nkòngamyakù wa Bible. Mbupidyà. *Bupidyà* m’“mpèkaatù.” “Èwu udi kàyi witabuuja ùkaadi mumanè kupiishiibwa,” Yone Munsantu 4, nwamònu’s, “mumanè kupiishiibwa.”

. . . beena bitàlù byàkapònà mu cipèlèlè abu anyi?

Ne mbangayi bààkadìcipilàye ne kabàvwa ne cya kubwela mu diikisha dyèndè, . . .

166 Dibènga kwitabuuja dyebe adi’s! Kaa, mushindu mwine wùngùikalàku ncìyi mwa kufika ku nshapità wanyì awu’s. Kàdi, tàngilàayi, ki lùtátù lùdi naalù ditùnga edi ndwòlò alu, leelu ewu. Bimanyinu ne maalù a kukèma’s mbiyè eku ne eku mu ditùnga dijimà edi. Cìdìbo bènza ncinyi? Bòbò’s mbatùngùnùke anu ne kuCyèla nyimà. Kàdi Yèyè wàkamba ne: “Nèndìcipè ne Ncyàkubàlekelakù bàbwela mu Buloba bùdìbo baashile lwendu abu to.”

167 Mbwalu kaayi ebu’s ne ekeleeziya minene eyi leelu ewu? Bupidyà bwabo’s mbuyòbòle Nzambi. Aleluuyah! Yèyè ùdi ne bukolè bwa ku mabwe aa kjuudila Abraham bânà. Yèyè wàkateeta kubàpèèsha Evanjeeliyo, kàdi bòbò bààkapapisha myoyi yabo. Bààkadìvwija tusùmbusumbu, ne bààkenza tuumàngumba twà tukese tukese ne: “Twètù tudi twitabuuja *cikampànda* ne katwèna twitabuuja cìngà cintu to,” nenku Nzambi kàvwakù mwa kubwelamù to. Dya leelu bàdi panshì anyi bàdi pa kazubu? S’bàkaadi beediibwe ku luseke.

168 Kasùmbù kakese kàà lulamatu kàà Nzambi aku, kàyaaya katàngile anu kumpàla, ne bimanyinu ne maalù a kukèma. Yèyè ùdi ùbèèla ku diteeta. “Mwànà wa balùme yònsò ulwàlwa kùdi Nzambi ùdi ne cya kwanji kwediibwa ku diteeta,” mwànà mulongesha’s.

169 Kantu kakese kàà kumpàlà kàdi kènzeke: “Kaa, ee, pàmwàpa kaCyèna ne bwa nsongo to, twamb’eku twamb’eku.” Wèwè udi mwànà mulela mu masandi, kàdi kwèna mwànà wa Nzambi to.

¹⁷⁰ Bwalu mwânà wa Nzambi ùdi Dimiinu dya Abraham, udi ubiikila bintu bìdì kabiyikù abi, bu ne bìdikù: “Nzambi ngudi mwambè nanku,” ne ùtùngunuka anu ne kuya kumpàla. Amen. Cìdì mwa kwambiibwa nî ncinyì, anyì nî ncinyì cya cishìlàngàne, yéyè ùdi ùtùngunuka ne kuya kumpàla, nansha bishi. “Nzambi ngudi mwambè.”

¹⁷¹ Bidimu makùmi abidi ne bitaanu yéyè kwindila mwânà awu, nansha mùvwàbì bibèngàngàne amu. Ne yéyè wàkaditápulula ne beena bupidyà abu, amen, bwa wàmòna mwa kwitabuuja. Kaa, ekèlekèle! Ngààvu kuumvwa bwena Nzambi bwàmbwedi.

Anjì elàayi meeji ku bwalu abu. Bìdì bikèngela ùditápùlùlè ne dīyì diswika dya pa buloba adi dya ne: “Aa, matùkù a bishimà awu àkaadi mapite. Cintu bu Aci kacitukù to. Aci ndikolesha dya maalu.” Tápulukà.

¹⁷² Bible mmwambè ne: “Pàtukàayi munkaci mwabo, ne ikàlaayi batápùlùke, mmùdì Mukalenge wàmba, ne Mémè nèn nwàkidilè.” Bilenga kaayi! “Mémè nèn nwàkidilè,” paanyimà pàà nwènu bamanè kutápuluka. “Nenwikalè bàna Bàanyi, Mémè nèngiikalè Nzambi wenù.” Tápulukà, kùdiswìki mu cikòkedi cìmwè ne beena bupidyà to. Ncya bushuwa.

¹⁷³ Nsongàalùmè muswe kusèlangana, usèla nsongàakàjì kampànda udi kàyi mwitàbùùje; anyì nsongàakàjì kampànda ùsèdiibwa kùdì nsongàalùmè udi kàyi mwitàbùùje. Kwènjikù aci to. Nansha nsongàalùmè awu mulenga wa bishi, ne—ne, anyì nsongàakàjì awu nansha yéyè mulenga wa bishi, ne mèsù àdiye n’awù awu nànsa manènè a bishi; byònsò abi nebijiminè dimwè dya ku matùkù aa. Kàdi, mwanèètù, musùùkà wèbè’s newikalè ne mwoyi kashidi. Dìmuka bwa cyùdì munkaci mwa kwenza aci. Nsongàakàjì awu yéyè kàyi mwena kwitabuuja mulelèlè, anyì nsongàalùmè awu yéyè kàyi mwena kwitabuuja mulelèlè, kùdiswìki ku cikòkedi cya mushindu awu to. Shààla muditòle ne cya nanku. Necikukèbèlè ntàtu kumpàlà kùyaaya aku.

¹⁷⁴ Mpindyewu tèelejàayi, mvensà wa 17.

Kàdi . . . mbanganyi bàvwàye . . . muumvwile bibi munda mwa bidimu makumi anaayi abu? Kabàvwa ng’aba bààkenzà mpèkaatù, beena bitàlù byàkapònà mu cipèlèlè abu anyi?

. . . aba bààkadìcipilàye ne kabàvwa ne cya kubwela mu diikisha dyèndè, . . .

¹⁷⁵ Bààkapàtuka, kàdi, bààkamòna bishimà, kàdi kabààkafikakù ku buloba bulaya aku to. Anu bùngì busòbola, babidi, mbààkabwelà mu buloba bulaya.

¹⁷⁶ Mpindyewu cìdì Pòlò munkaci mwa kwenza ncinyì? Ùdi wàkula ne beena Kilisto mpindyewu ne: “Kanùlekedikù Evanjeeliyo umwèumwè ewu to, wàkayiishiibwa kwàka awu, ku bimanyinu ne maalu a kukèma, ne Dikunji dya

Kapyà dibàlombola; piikalà bintu ebi byènzeka cyàkàbìdì, kanùdishindi kumpengà kwa njila, ku bupidyà, mu kubanga kwela kwà mpatà, bwalu bitàlù byabo byàkapòna mu cipèèlà.”

¹⁷⁷ Mpindyewu tudi tukùfika, lùkàsà lùkàsà mpindyewu. Tàngilàayi ne ntèmà.

... *piikalàbi ne kî ng'aba bàvwà kabàyi bashààle ne mwoyi abu anyi?*

Pa nanku tudi tumòna ne bóbò kabàvwa ne cya kubwela to bwa bupidyà.

Ûdi ùcibìikila *mpekaatu* musangu, ùcibìikila *bupidyà* musangu wùdì wùlondà. *Bupidyà* m’“*mpekaatu.*” “Kabààkabwela to, bwa bupidyà bwabo.”

¹⁷⁸ Bààkamòna mupròfetà awu, Mòsà. Bààkamòna cyàkenzàye, bamòne cyàkambàye. Cìvwa Bulelèlà, musangu wònsò, kacya anu wàtùngunuka, Bulelèlà. Dikunji dya Kapyà edi òvwa dimwènèka kumpàlà kwabo. Bàvwa bàDìbandila. BààkaDimòna.

¹⁷⁹ Pòlò, ùteeta bwa kuleeja, pashìishe, bwa kuleeja kaaba aka, dilabula dyàkenzàye adi. Nwamònu anyi? Ùteeta bwa kulondelanga dilabula adi, wàkadifwànyikija ne Dipungila Dikùlukulu. Kwabayè ne: “Mpindyewu tudi babwelè mu cintu cipyacìpyà, mu cipungu cipyacìpyà eci, ne Yesu Kilisto. Mu bikondo bya kale, Mukalenge ùvwa ùbamwènekela kùdì bapròfetà, kàdì mpindyewu Ûdi ùbamwènekela ku Mwan’Èndè, Yesu.” Nwamònu anyi? Ki kubangayè kufwànyikija malabula awu ne kubàleeja cìvwà cyènzekà, mùvwà bimanyinu ne maalu a kukèma, ne bikwabo byònsò, ne bìvwà bifunda abi.

¹⁸⁰ Mpindyewu kwabayè ne: “Kabààkabwela to, bwa bupidyà bwabo.” Kabàvwa biitàbùùje to.

¹⁸¹ “Kàdì mpindyewu, twètù, twètù tudi tubwela mu cipungu cipyacìpyà, nenku kanùpapishi myoyi yenu to. Kanwènjikù maalu mwàkenzàbo bóbò amu to, mu matùkù a diyòbola awu, pàakayòbolàbo Nzambi apu.” Bààkenza ciine aci munyi? Kì mmu kwikala ne nsòmbelu wa masandi to. Lekèlaayi nnùtòokèshilèku cyòci eci.

¹⁸² Wèwè udi wamba ne: “Mwanèètù Branham, mèmè’s ntu nya mu ekeleeziya.” Abi’s mbìmpè. “Ncìtukù mwanjì kushima to kàcya bàndela.” Abi mbilenga. “Kacya ncìtukù mwibè to. Ncìtukù mwenzè *cikampànda*, *cikansanga*, anyi *cikankènga* to.” Abi’s mbìmpè be. Byònsò abi mbìmpè. Kàdì, abi kabyèna anu mpèkaatù to.

¹⁸³ Mpèkaatù mpàdi Nzambi ùDìleeja kàdì wèwè ubènga kuCìitabuuja, kùyi muswè kuCìtèèleja to.

¹⁸⁴ “Kaa,” mùdì wamba, “wanyì ekeleeziya kàtu ùlongesha Aci to.” Pàdìbi anu ne Bible ùdi ùCìlongesha, ne Nzambi ùCìjaadika, s’ki cintu cyòci aci.

Mpindyewu tangilàayi anu katanci cyaààà. Mpindyewu netùtwadijè mpindyewu cintu kampàndà cya ndòndò, cya ndòndò menemene. Mpindyewu, tèèkaaku mwoyi pa mukwabo too ne pawàpàtukà.

185 Mpindyewu tàngilàayi ne ntèmà yònsò.

Ki bwa cinyi twikalàayi ne dicìina, bwa ne nkwèpì, mulayi mutùshùila wà dibwela dyà mu dyèndè. . .

Dyèndè, dyèndè, mupinganyi muleeji muntu mpindyewu. Cinyi?

. . . kwàvwà umwe wenù mufwànyine kwùpangila.

186 Mpindyewu, Pòlò ùdi ùteeta kubàmbila, mu nshapità udi mudyànjidile awu, pa maalu ònsò aa. Kàdi mpindyewu yéyè ùdi ùteeta kubàmbila cidiCi.

Kaa, tudikù ne díbà anyi? Ndi. . . Pàmwàpa mbímpè bwa twètù kwindila too ne dilòlò edi. Díbà dyàyi, kàdi peetu's netwènzè mudimu wà babèèdi. Pàmwàpa mbímpè tucyàngatè dilòlò edi, bwalu eci ncyùle tètè anu menemene ne maavitamines, maavitamines a nyuma. Ndi ne byàbùngì bya dyaenza, ne ndi ndìbwinka mu mudimu mu mapingaja emu. "Twikalàayi. . ."

Ki bwa cinyi twikalàayi ne dicìina, bwa ne nkwèpì, mulayi. . .

187 Mpindyewu, bàvwakù ne mulayi wà buloba bulaya, mu Èjiipitù mwàmwa anyi? Nenku, díbà adi, Nzambi kutùùlukaYè, bwa kuvwija mulayi ewu ne mmulelèlè. Mòna's, Nzambi ùvwa mwambìle Abraham, nkàmà ne nkàmà ya bidimu kumpàla ne, Yéyè neàcyènzè. Cìvwa ncyà mu Mifùndu.

188 Yòzefù wàkamba ne: "Kanùùmushikù mifùbà yànyì kaaba aka to too ne panwàya ku buloba bulaya abu nenku nùkanjiikè kwòkù aku pàmwè ne baataatù bàànyì." Bwalu, yéyè ùvwa mumanyè ne dibìikà dya ku lufù òvwa dilwa, pààkabìikà Yesu ku bafwè apu, bwalu ùkaavwa mumanyè cìvwà Yobò mwambè. Nwamònu anyi?

189 Yònsò wa ku bapròfetà abu ùvwa mumanyè anu menemene cìvwà mupròfetà mukwabo mwambè, ne ùvwa mumanyè ne Nyuma wabò ùvwa umwèumwè awu. Nenku bàvwa bindile. Kaa, mwanèètù! Kaa, aci's bivwa bikèngela kutùnyùkushaci ne kutùpàtulaci mu ngiikàdìlù wetù wa maalu a pa buloba ewu. Bàvwa bòbò batwishile mèsù, kaciyi pa bivwà bantu bàmba to, kàdi pa bivwà bapròfetà abu bambè. Yònsò wa kùdìbo ùvwa mwindile.

190 Abraham wàkamba ne: "Njiikàayi anu apa mene pààkajiiibwà Yobò apa." Yéyè ne: "Sarah, nènsumbè katùpà kàà buloba. Netwikalè mwa kujiikiibwa kaaba aka mene."

191 Izàkà ùvwa mupròfetà, paanyimà pàà papa wendè. Kwambayè ne: “Tèèlejà. Kùnjiki mwaba mukwabo kanà wónso to, kí mmu Èjiipitù mwàmwa to, kàdì wàlukilè naanyi mu buloba bulaya. Ùnjiikè anu mwaba ewu mene.”

192 Yakòbò wàkafwila pambèlù pàà buloba bulaya, kàdì wàkambila mwanèndè wa balùme, uvwa mupròfetà awu, ne: “Udi mumanyè’s, bufùkù kampànda Mwanjelo wàkandenga mu luseke emu. Kacya anu apu mèmè kushààla ntebuka. Lwá, tèèka cyanza cyebe. . .” Kaa, luse wè! “Mwanàanyi mupròfetà, nkàadi mununu ne nkàadi mpofo. Kàdì tèèka cyanza cyebe cya cijila aci, bu mùdì wèwè mwine mupròfetà, ùcitèkè mwaba wùvwà Mwanjelo mulengè ne Cyèndè cyanza ewu, ne ùdicipè kùdì Nzambi wa mu Dyulu ne kwàkunjiikakù muneemu emu nansha.”

193 Dibènesha diikalè kùdì. . . Nudikù numòna dibuulula dya nyuma dya Díyi adi anyi? Mòna’s, cyàbibidì cyàbò, bàtwè ku bya pa lukàmà makumi citeema, kabàvwa bamanyè civwàye wàmba aci to. Kàdì yèyè ùvwa mumanyè civwàye wàmba aci. “Tèèka byanza byebe bya mupròfetà abi pa mwaba wùvwà Mwanjelo mutèèke Cyèndè cyanza ewu. Mèmè ewu kale wàwa mwva muntu munene, wa mukici, mutulùmùke wa mukici. Kàdì, Yèyè kundenga, ne kacya anu piine apu nkàadi muntu wa ùtebuka. Kàdì nkàadi mwànà wa mfùmù kacya anu ngàbanga kutebuka. Kacya anu ngàshintulula mushindu wànyi wà dyenda, nkàadi mwànà wa mfùmù.” Eyowa’s. “Tèèka cyanza cyebe apa nùnkù. Ùdicipè kùdì Nzambi wa mu Dyulu ne, kwàkunjiika muneemu emu to.” Bwa cinyi? Muntu nansha umwe kàakamanya civwàye wàmba aci to. Yòzefù yèyè ùvwa mumanyè. Kwambayè ne: “Nùye naanyi kuntwaku ne nùkanjiikè mu buloba bulaya amu.” Ki mwaba wùvwàci ngwòwò awu. Cya bushuwa’s.

194 Pàakafwà Yòzefù, paanyimà pàà bidimu, wàkamba ne: “Kanùnjiikiku muneemu to. Kàdì ikàlaayi nutàngila mifùbà yànyi panùdì nupicilapù apu, bwalu dîngà ditùkù nwàdyàkupàtuka muneemu emu. Ne pa nwènù kuya apu, angàtàayi mifùbà yànyi nùye naayi.”

195 S’ki bwalu mbwòbù abu’s. Bàà pa buloba bàmbè cyàswàbo kwamba aci, ne bènzè cyàswàbo kwenza aci. Dîna dya Mukalenge dibeneshiibwè. Ndaminàayi mu Kilisto, piikalàbi ne ndi mbìikidiibwa nî ncinyi cyònsò, mukoleshi wa maalu, anyi munsantu mubùnguluki wa mu malaba. Dîngà ditùkù Yèyè nealwe, ne aba bàdì mu Kilisto Nzambi nealwe naabò pàmwè Nèndè, pàalwàYe apu. Cyònsò m’Bulelèlè bwa nyuma, bubuulula butèèka anu mwab’awu mene, ne bikèngela meeji a nyuma bwa kuBùbàkula. Shààla mwikishilepù, ditùkù dijimà. Elàngànàpu meeji. Nansha kùyi mudyè cyàkudyà cyebe cya mundaamuunyà to, elàngànàpu meeji.

196 Nenku dilòòlò edi, netùbwelè mu Diikisha Dyèndè, òwà dishààle adi, bwa tùmònè cìdì mulayi ewu leelu. Cintu eci leelu ncinyi? Byòbì ne Nzambi kèna naaCì mu Bible emu, ne kàyi ùCijaadika to, pààCì anu kaaba aka mene mpindyewu, dîbà adi mèmè's ndi mupròfètà wa mashimi. Ncya bushuwa menemene. Kàdi Cìdì kaaba aka. Diikisha edi ncinyi?

197 Mmwambè ne:

Mpindyewu, *twikalàayi...ne dicìna, bwa ne nkwepi, mulayi mutùshùila* bwa kubwelamù anu mwàkenzàbo, . . .

198 Ne Cìdì ne cya kwikala mulayi wùm wèwùm wè awu. Cìdì ne cya kwikala diikisha dimwèdimwè adi. Ùdi ne cya kwikala Nzambi umwèumwè awu. Bìdì ne cya kwikala bimanyinu bìm wèbìm wè abi. Cìdì ne cya kwikala cintu cìmwècìmwè aci. Kàdi twikishàayi. Mpindyewu Cìdì ncinyi? Mukalenge àswèkù àcìfilè dilòòlò edi.

Patùdì twinyika mitù yetu apa.

199 Mukalenge mubènesha, anu Cyendelele ki cyàsokololà bintu binène bitùdì mpindyewu twabanyangana ebi. Kakese. . .

Bààbùngì mbàdì balongolwela dipiila. Anu mÙdì mwambè mu Mukàndà wà Yudà, ne: “Bantu, bàà kale badyànjila kulongolwela dipiila, bàvwa mwa kwangata ngàsà wa Nzambi wetù kàdi kumuvwija wa masandi makolè.” Ne bààbùngì leelu ewu ki kuyiishabò Evanjeeliyo eku, ngàsà wa Nzambi awu, bàMuvwija màyelè a dikèba naawù mfrangà, kupeta ekeleeziya munene ne bantu bapìte bùngì mu kàlaasà kàà Dyàlumingu, bàngata ngàsà wa Nzambi bàmuvwija wa masandi makolè. Kàdi bàà pa buloba bàdì mpofo, ne bènda mùdì ngulube mpofo amu. Kabèèna bùm vwa nansha.

200 Éyì Nzambi wa yààyà, tùkàngùlèku cyumvwilu. Cyumvwilu cyetu kacìikadikù mùdì cya bânà bàà buloba ebu to. Bwalu Wèwè udi mwambe mu Dìyì Dyebe, ne: “Bânà bàà buloba ebu bàdì ne lungènyi kutàmba bânà bàà Bukènkè.” Ku cibangidilu bìvwa nanku, “bânà bàà Kaayinà” bààkalwa bamanyi banene mu maalu a mamanya. Bààkalwa balongeshanganyi banene. Bààkalwa benji bàà byamù bya mudimu. Bààkatùngunuka ne kutanta, batèndeleeedi bàà dipòkò, kàdi bààkapiùshiiibwa ne bààkatùkijiibwa mu dilumbulwisha. Nènku bitàlù byàbò byàkashààla bilèlème pa màyi, kàdi misuùkà yabo yàkaya mu iferno.

201 Ne Yesu wàkaya ne wàkaakula naabò, pààkafwàYè. “Ne Wàkaya mu iferno ne kuyiisha misuùkà yìvwà mu bùlokò, yìvwà kayìyi minyingàlale mu cikondo cya lutùùlù, mu matùkù a Noà,” mùdì Mifundù yàmba. Nenku Nzambi, pàvwàYe mwimàne pa buloba, Wàkamba ne: “Anu mwàkadìbì mu matùkù a Noà, ki mwikalàbì kabidì ku dilwa dya Mwànà wa muntu.”

202 Kàdi tudi tumòna ne, “ndelàngànyì ya Setè musangu awu,” bantu badìpwekeshi, balùmè bàà Nzambi bàà menemene, kabàyi bamanyè bintu bya pa buloba bipitèpìte bûngì to, kabàyi bàcyùka bintu bya pa buloba nànsha kakesè to, kàdi bàvwa bôbô batèèke ku luseke bujitu bwònsò ne biitàbùùje Nzambi, ne bààkalwa bapròfetà ne bantu banene mu Bukalenge. Pàvwàbi ne bakwabo, bakwabo batèndeledi abu, bàvwa bàbàseka, bàbèèlulwila. Kàdi dîbà kulwadi dyàkalwà mvùla ayi ne dinyooka.

203 Ki mwàkadibi kabidi ku dilwa dya Yesu Kilisto. MwàkaMusekàbo ne kuMwelulwilabò, pàvwàbo ne ntèndeleeleu ne ekeleeziya yabo sungasunga minene ayi. Kàdi bàkeelulwila Mutooto wa mu Dinda, ne bààkaMuseka. Kàdi nansha nanku bààkabwela mu dilumbulwisha. Kàdi pààkanyeemàbo kuya ku Yèlusàlèmà, ki kuyabò kadìilakù bânà bààbò balela, bwa nzala wa kavwambù, ne mashi àbò àkapweka too ne pambèlù pàà biibi bya mìsèèsù pààkooshàbo cimenga aci ne ntempèlù, ne mìsùùkà yabo yàkaya mu iferno.

204 Mukalenge, s’ki twètù aba cyàkàbìdi, bwa musangu mwisâtù. Ewu mmusangu wà mwoyi. Isatu nnomba wa mwoyi. Nenku’s ki twètù aba, badìlongòlòle bwa Dyambwibwa.

Ekeleeziya mutùngùnùke ne diya; bantu banene bàà maalu a mamanya; ekeleeziya leelu ewu myùle tètè ne beena kwitabuuja beedi bàà mpatà. Makumi a binunu biikàle ne mènà abo mu mukàndà, eyowa, miliyò, kàdi baswè kwikala bàseka Evanjeeliyo, ne bàmba ne: “Kì mbalongè kàlaasà to. Kì mbamanyè to.”

Pàmwàpa mmùdibi, Mukalenge, kàdi bitùdi bapangile mu dilonga dya tùlaasà abi, Wèwè udi ubikumbajila mu ngàsà mu kutùmà kwa Mwanjelo Webè wa Bukènkè, mu kumwènesha kwa bukolè Bwèndè, ùshìndika Mèyi bwa aba bàdi bapèlè ne bapangè mukàndà bu twètù kùnu. Kàdi tudi baKunangè bwa cyòci eci, bwalu ngàsà wa Nzambi ngudi mucyènzè, ne tudi tumanya ne tudi balediibwe. Ne twètù biine katwèna balenga to, nansha kakese. Tudi babì bàà nkòtòòtò. Kàdi Wèwè, ku ngàsà, udi mwolòle cyanza Cyebe cya luse aci panshi ne mutùtábàje mèsù, mwàkatùsambidilà Yesu amu; mwàkenzà Eliyà bwa Gehàzi amu, pààkakènzakanàye bwa kumòna mu nyùngulukilu wendè. Kàdi leelu èwù mèsù ètù mmatàbàle, ne tudi tumòna bintu bya Nzambi, ne bamanyè ne tudi mu mudimu ku cikondo cya nshiikidilu, pàkaadi matùkù a bàà Bisàmbà bya bendè àmba kujika apa, ne Yèyè neàsungulè cisàmbà bwa Dîna Dyèndè. Enzàku bwa túbadiibwèmu, Mukalenge, tudi tulòmba ne kudipwekesha kwònsò. Tudi tulòmba bwa Wacifilakù.

205 Tùbènèshèku. Bèneshàku batèèleji bakese aba mu dinda emu. Mbafùmìne mu ntèndeleeleu ne miitabuuja a mishindu yònsò mishìilèshìilàngàne, kàdi bàbitèèkèku ku luseke leelu

ewu, Nzambi. Ne swàku bàtangilè buludì ku Kalvariyo, bàmba ne: “Nzambi, mfwimbèku ne mpèèshèku mbùngakeenu. Ndi bu mùdì. . .” Mupròfetà wàkamba ne wàkaya kwà mufwimbi, bwa wàmònakù mwa kuingutudiibwa ne kufwimbiibwa cyàkàbìdì. Tùfwimbèku ne tùpèèshèku mbùngakeenu mu mushindu wùdì Nzambi muswè kutùvwija awu. Nansha byòbì bikèngela bwa twètù kwikala cikòlopò mu Nzùbu wa Mukalenge. Mbipiciibwe ne mèmè mwikàle cikùpwidi cya makàsà cya ku ciibi pamùtù pàà kusòmbela mu nntèntà pàmwè ne beena lwonji. Nenukuzà enkà nanku, Mukalenge. Tùbènèshèku anu mpindyewu, ne tulamèku badipwekèshe. Myoyi yetu yikalèku mikàngula, meeji ètù makezùke, ku bintu bya Nzambi, bwalu tudi tulòmba nùnkù mu Dìna dya Kilisto.

206 Ne mitù yetu miinyika, ndi ndikonka ní kùdikù muntu muswè bwa tùmuvùlùkè mu mwakù wà disambila, bwa lupàndù lwà musùukà wèbè? Udikù mwa kwela cyanza muulu anyi, paùdì anu ngènzàmpèkààtù cyanàànà? Nzambi àkubènèshè, wèwè nsongàalùmè wa citende. Mukwabo muntu? Nzambi àkubènèshè, paanyimà pààpa, mukalenge. Nzambi àkubènèshè, inàbànà. Mukwabo muntu udi muswè bwa tùmuvùlùkè mu disambila mpindyewu mene, bwa musùukà wèbè? Nzambi àkubènèshè, mukalenge, wèwè udi ne cyanza cyela muulu awu. Ne Nzambi àkubènèshè, ne wèwè udi apa ewu. Bilenga be. Nkufwànyìnèkù kwikala mukwabo anyi, patùkaadi pa kujikija apa? Ndi ngumvwa ne mbafwànyìne kwikalakù. Nzambi àkubènèshè, paanyimà pààpa, mukalenge, mu ndekeelu mwàmwa.

207 Twàmbè ne, mpindyewu tàngilàayi, ndi muswè nnùkonkèku cintu kampànda. Ncyèna muswè nwèlè meeji to nansha kakese ne mbwalu n’tabernacle mukese ewu. Ncyèna muswè nwèlè meeji ne mbwalu mbantu aba to. Nenukuzà Nzambi wa luse awu, kanwèdikù meeji ne bwalu Mwanjelo wa Mukalenge mmuDi kwàcishe naanyì fòtò, nenukuzà ndi. . .ne—ne cintu cya nanku awu, bwa kwenza nanku to. Éyi Nzambi! Mèmè mudyùmvwè nanku, díbà adi, mwanèètù, bikèngela ngiikalè ku cyoshelu pamutù pàà kunùbiikila nwènù. Kàdi ndi ngamba eci, ndi ngamba eci anu ku Mifundu, bwa nùmonè ne eci m’Bulelèla. Bu ne mvwa muCyàmbè, ne ki cyònsò cìvwàku, muyè bu muyiishi mukwabo kanà yònsò ewu anyi cintu kampànda, anyi nì ncinyi cikwabo, ee, díbà adi, nùnkù’s mbishiilàngàne. Kàdi udi umòna cintu aci, Nzambi ùlwa paanyimà buludì ùjaadika ne m’Bulelèla. Nwamònu anyi? S’ki cidi cyèenza ne Ciiikalè cilelèlè’s, mpàdi Nzambi ùCijaadika. Ne pashiishe, kaciyi anu aci nkààyaaci to, kàdi Diyì Dyèndè dyàmba ne Yèyè neàcyènzè. S’ki Yèyè ewu ùcyèenza.

208 Mpindyewu wèwè kùyi mu bwakàne to, mwoyi wèbè kawùyi mujaalàme kumpàlà kwà Nzambi to, udikù mwa kwela anu cyanza muulu anyi? Ambà ne: “Nsambidilèku.” Eyo, anu mwaba

wûdi awu. Byanza bitwè ku mwandamukùlu anyi dikumi mbyela muulu, bàkèba luse bwa misùukà yabo. Panùcidi ne mitù yenu miinyika apu, sambilaayi mpindyewu. Vùlukà ne, wèwè ngudi ne cya kunyingalala. Mèmè ndi nkulòmbela anu cyanààna, bwa Nzambi ikalèku ne luse. Kàdi's ki cyoshelu ncyôci aci, Nzambi wàkufikishì ku mwaba kampànda mu meeji ebe amu; ki cyoshelu ncyôci aci. Tutu twitabuuja dilwa dya ku cyoshelu, ncyà bushuwa, kàdi aci kacyèna—aci kacyèna. . . Bidi anu bîmpè. Kàdi cyoshelu cyebe cilelèlà mmwaba wûdi Nzambi mutwilàngàne neebe awu. Ne Yèyè mmutwilàngàne neebe mwaba mene wûdi musòmbe awu. Ki cyoshelu cyebe ncyôci aci.

²⁰⁹ Mpindyewu ambà ne: “Nzambi, ikàlàku naanyi luse, mèmè ngènzàmpèkàatù ewu. Ne kubangila ku leelu, bu Wèwè mwa kunkwàcishakù, nèngiikalè ne mwoyi Bwebe Wèwè. Nè—nènKukwàcile mudimu. Cidi ní nganyi ní nganyi wàmba nansha ciikàle cinyi, nyewù ngeela cidya, mu dinda emu. Nyewù nsambidila anu kaaba aka, ne Wèwè ngumùshèku nyuma wa kale wa muntu mupangè maalu ewu. Ungumùshèku cijji eci. Ndi mumanyè ne ncyèna mwa kwenza maalu mushindu awu kàdi kwikala mujaalàme kumpàlà kwà Nzambi to. Kabidi ndi ne lukinu mu mwoyi wanyi. Ndi ne mukàwu. Ndi ne budimù. Ndi ne *cikampànda*, *cikansanga*. Byùmùshèku, Nzambi. Ncyèna muswè kwikala nanku to. Mvwijèku wa kalolo, ne mudipwekèshe, ne mupòle. Mvwijèku mutalàle maalu. Mvwijèku muntu wa mufwànyineku kufikisha bakwabo Kùdi. Swàku ngènzèku cintu kampànda Bwebe Wèwè bwa kuleejakù dyanishu mu nsòmbelu wanyi.” Ki disambila ndyadi dyûdi wenza mpindyewu, patùdi tusambila bônso pàmwè apa.

²¹⁰ Taatù wa mu Dyulu, m'Beebe Wèwè. Bàdi mamuma a Dyiisha mu dinda emu. Bèdi byanza muulu. Cintu kampànda ncyàbènzèjì aci. Bòbò—bòbò bèdi mikenji yà dikòkiibwa dya kùdi buloba kadyòmbò pèdibo byanza muulu apu. Kùvwa nyumà kampànda munda mwàbò udi mwangàte dipàngadika. Bèdi byanza byabo muulu ne, bitàbùùjì Mufùki Udi mubàfùke.

²¹¹ Mpindyewu, Taatù wa mu Dyulu, ndi ndòmba bwa Ùbàbènèshèku, ne ùbàpèèshèku Mwoyi wà Cyendelele, mpindyewu mene. Kakwèna cindiku mufwànyine kwenza to; kubàikidilla mu nyungulukilu wa cyoshelu, kubàtèeka mu cibambalu cikwabo, kwenza mudimu wònsò awu. Bidi—bidi bikèngela ùcyènzè Wèwè, Mukalenge. Twètù katwèna ne cikwàbò cyà dyenza to ànu kuyiisha Dìyi. Wèwè udi mwambè ne: “Diitabuuja didi difùmina ku ditèeleja, ditèeleja dya Dìyi, Dìyi dya Nzambi.” Mpindyewu, nyewù twàyiishì Dìyi, ne bòbò bèdi byanza byabo muulu ne, bàDìtàbùùjì. Mpindyewu bàpèèshaaku Mwoyi wà kashidi, bwalu Wèwè utu mulayè ne neÛcyènzè. Piikalàbi ne bàvwa ne meeji matòoke pa kwela kwà byanza muulu, nebàpatukè mu citanda eci mu dinda emu, mwena

Kilisto wa kalolo, mutalàle maalu, mudìpwekèshe, bwalu Wèwè ngwákacilaya. Ne Mèyi Èbè kaènakù mwa kupangila to. Ndi ndòmba nùnkù mu Dìna dya Yesu Kilisto. Amen.

Mpindyewu ndi ntàngila, mwindìle ne njinga ngamba kufwà,
Mwindìle Cimenga cya cibàlakana, cyàkamònà
Yone cìpweka aci.

Mu Cimenga cya cibàlakana aci. . .

Kuukwilaayaaku mpindyewu.

. . . cimenga citòòke cya masàngà,
Ndimù ne nzùbu mwalàbàle, lùnkòmbè ne
cifulu cya butùmbi;
Mpindyewu ndi ntàngila, mwindìle ne njinga
ngamba kufwà,
Mwindìle Cimenga cya cibàlakana, cyàkamònà
Yone cìpweka aci.

²¹² Kanwènaayikù anu baMunangè anyì? Diiyiisha dyàjikì, mpindyewu. Eci ndikuukwila. Katwèna tulwa mu ekeleeziya anu bwa kutèèleja diyiisha to. Tudi tulwa bwa kukuukwila. Pwàku anu mwoyi muntu udi ku luseke kwebe aku awu. Mukuukwilè anu Yèyè cyanàànà. Kaa, bilenga be! Bilenga bilayà! Mwambìle anu mu wèbè. . . Kabyèna bikèngela anu wèwè muMwambìle ne dîyi dikolè to. Mwambìlè anu munda mwa mwoyi wèbè amu ne: “Ndi muKunangè, Mukalenge. Mfwilèku luse ku mpèkaatu wanyì awu.” Kaa, ekèlekèle!


. . . Cimenga citòòke cya masàngà,
Ndimù ne nzùbu mwalàbàle, lùnkòmbè ne
cifulu cya butùmbi;
Mpindyewu ndi ntàngila, mwindìle ne njinga
ngamba kufwà,
Mwindìle Cimenga cya cibàlakana, cyàkamònà
Yone cìpweka aci.

²¹³ Taatù wetù Nzambi, twàkìdilaaku. Tudi bindìle, patùdì tutèèleja Dîyi apa, tujinga twamba kufwà. “Myoyi yetu yidi ne nyòòtà Yebe, anu mùdì ngulungù ùjinga kasùlù kàà màyi. Musùukà wètù wùdì ne nyòòtà Yebe, Éyi Nzambi.” Tujinga twamba kufwà, ne bindìle, bindìle dîbà dyàlwà Yesu adi, bindìle dîbà dyàtùtùminàbo dîyi dya kuya mu dyulu adi. Kabiyi bwa kwimana kumpàlà kwà Mulumbulwishi ku cilumbulwidi to; adi dikaadi dimanè kupìta. Tukàadi bafwè ku bintu bya pa buloba, ne bamanè kubwela mu Kilisto, ne Yèyè ngukàadi mwambùle dilumbulwisha dyetu. Yèyè ùdi Mutùlumbulwidi mpindyewu, ku nkwaswa wa bwakàne. Mutùlumbulwidi wetù mubènèshìbwe awu, ngudi, pa ditonda dyetu, Utùlumbulwila cilumbu cyetu mu mushindu wà tumanya ne katwèna bakùmbànyine to. Mùvwà mwanèètù munanga wa bakàji mu dinda emu, mwambè mu bujaadiki bwèndè, ne wèlamù tuumeeyà twèndè ne: “Kacya anu

ndwa kaaba aka ndi muyiilè ne kaCyèna cijila cyànyì mêmè to, ncijila cya Nzambi.”

²¹⁴ Bulelèlà, Mukalenge, tudi tulongesha bantu ne, kakwèna cidi cimpè mu muntu to, nansha cìmwè. “Muntu nganyì’s bwa Wèwè kumuvùluka?” Kàdi nngàsà wa Nzambi udi mutùmwenèkèle. Nenku tudi beeyèmène anu dikùmbanyina Dyèndè Yéyè, kí ndyètu twètù to. Nenku tudi tuKukuukwila Wèwè, Nzambi Mutàmbe Cijila, bwa bwîmpè Bwebe, bwa ditùbadilakù mu Bukalenge Bwebe bunene, mu mpàngù Yebe minene. Nyewù tuKwakidila mu myoyi yetu, ku diitabuuja. Ne ku ngàsà, tudi twitabuuja ne Wèwè ngudi mutùpèeshèci bwa butùmbì bwa Nzambi, bwa mudimu wà dikwàcila Nzambi.

²¹⁵ Mpindyewu, Mukalenge, ondòpàku babèèdi pàdìbo bàlwa bwa kubàsambidilabò apa, mu dinda emu. Bàpèèshèku disànka adi, bu mùdìbo bàjinga bàmba kufwà bwa kuumvwa bìmpè. Bàmanyèku ne, lutàtù lukese ne lupeepèle lùdì lubèèla pambidi elu, cidi anu ncikondo cikese cya dyediibwa ku diteeta. Nzambi mmumanyè byònsò pa bwalu abu. Mmucyènzè bwa kumòna citwènta pa bwalu abu. Mushindu mwine wùdi Nzambi. . . Swàku bwa bèle cidya bàpatukèmu ne bàtondè mudimu mujikija awu! Swàku bwa Wèwè. . . Swàku bwa bôbò kabàkuyòbolukù to, pa kunyeemakana *apa* ne *pààpa*, ne *bàbwela bàpàtuka* ne: “Ee, ncyèna mumanyè *cikampànda, cikansanga*” to.

²¹⁶ Mukalenge, swàku bwa bàngatè kaaba kajaalàme, bàmba ne: “Mukalenge, Wèwè ng’Wàkansùngila awu. Wèwè ng’Wàkangenzela bintu ebi. Ndi muKwitàbùùje, ne ndi nkweyemena, leelu ewu.” Ne ndi ndòmba bwa Wèwè kupèèsha bantu cyôci eci, mu Dîna dyà Kilisto. Amen. 

EBÈLÙ, NSHAPÌTÀ MWISÁTÙ LUA57-0901M
(Hebrews, Chapter Three)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu ditùkù 1 dya ngondo wa citeema, cidimu cya 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org